

華陽國志

冊二



華陽國志卷第九

李特雄期壽勢志

李特字玄休略陽臨渭人也祖世本巴西宕渠子蕩字仲平好學有  
鬼巫漢末張魯居漢中以鬼道教百姓賚人敬自門升天一虹中斷  
西之宕渠移入漢中魏武定漢中曾按會字不當有祖冉相當貴有劉化者

胡按當有約楊車李黑等移於略陽北土復號雋天姿奇異終為人

為東羌獵將特兄弟五人長兄輔字玄政次特特弟庠字玄序庠弟  
流字玄通流弟驤字玄龍皆銳驍有武幹特長子蕩字仲平好學有  
容觀少子雄字仲雋 初特妻羅氏夢雙虹自門升天一虹中斷

羅曰吾二兒若有先亡在者必大貴雄少時辛冉相當貴有劉化者  
道術士也言關隴民皆當南移李氏子中惟仲雋天姿奇異終為人  
主鄉里人多善之與叔父庠並以烈氣聞人多歸之 既克成都

衆皆飢餓驤乃將民入鄴王當作城食穀芋 雄遣信奉迎范賢

欲推戴之賢不許更勸雄自立 永興元年冬十月楊褒楊珪共

勸雄稱王雄遂稱成都王追尊曾祖虎曰巴郡公祖父慕隴西王父

特景王母曰太后追謚世父輔齊烈王仲父庠梁武王仲父流秦文

王兄蕩廣漢壯文公以叔父驤為太傅庶兄始為太保外兄李國為

太宰國弟離為太尉從弟雲為司徒璜為司空閻式為尚書令褒為

僕射發為侍中珪為尚書洪為益州刺史徐輿鎮南王達軍師具置

百官下赦建元大武按建元大武當作改元建興國號大成通鑑考異云十六國春秋目錄雄年號建興二晏平五

與華陽國志同今從之諸書雄改元晏平無大武年號惟晉載紀改元大武無晏平年號按雄國號大成魏書雄傳云雄稱帝號大成改

年晏平故二十國春秋誤云改年大成載記轉寫誤為大武今從諸書李至校刊此書轉依載記誤改甚非迎范賢為丞

相從弟置流子也以不陪列誅之賢既至尊為按當有四時八節四字通鑑考異云華陽

國志尊長生日四時八節天地太師可天地太師封西山侯復其部證亦李至校刊此書轉依載記所刪也

曲軍征不預租稅皆入賢家賢各長生一名延久又名九重一曰支

字元涪陵丹興人也 光熙元年雄稱皇帝改元晏平 永嘉

三年羅蒙冒琦等殺李離於梓潼時閻式去雄依離并見殺驤攻不克時李雲李璜皆戰死

明年文碩殺李國以巴西梓潼

當衍此二字

爲晉平寇將軍李鳳在晉壽

梁州先以爲雄所破不守而譙登

在涪平西參軍向奮屯安漢之宜福張羅屯平無逼雄雄將張寶弟全在冒琦中雄遣寶反爲奸許以代離寶素凶勇先殺人而後奔梓潼密結心腹會羅尙遣使慰勞琦琦等出送其使寶從後閉城門琦等奔巴西雄得梓潼拜寶爲太尉雄自攻奮奮走遣驤攻登登初將驤子壽欲以誘驤被攻急救援不至還驤壽

五年春驤獲登遣

李始督李鳳攻巴西殺文碩是歲雄姨弟任小受張羅募手刃雄頭雄幾死改元玉衡

是後扶風鄧芝揚虎等各率流民前後數千

家入蜀以鳳爲征北梁州任回鎮南南夷寧州李恭征東南蠻荊州皆大將軍校尉刺史雄驤勤卹百姓於內鳳回恭招流民於外稱有功氏符成隗文旣降復叛手傷雄母及其來也咸釋其罪厚加待納

皆以爲將天水陳安舉隴右來降武都氏王楊茂搜奉貢稱臣杜弢自湘州使使求援晉涼州刺史張駿遣信交好漢嘉夷王冲遣子入質頃之朱提審炤率民歸降建寧爨曇蒙險委誠其餘附者日月而至雄乃虛己受人寬和政役遠至邇安年豐穀登乃興文教立學官其賦民男丁一歲穀三斛女丁一斛五斗疾病半之戶調絹不過數丈繇不過數兩事少役稀民多富實至乃閭門不閉路無拾遺獄無滯囚刑不濫及但爲國威儀無則官無秩祿職署委積班序無別君子小人服章不殊貨賄公行懲勸不明行軍無號令用兵無部伍其戰勝不相讓敗不相救攻城破邑動以虜獲爲先故綱紀莫稱

李鳳在北數有戰降之功時蕩子稚屯晉壽害其功 大興元年

鳳以巴西叛驤討之久住梓潼不敢進雄自至涪驤遂斬鳳以壽代

鳳以知州征事

按以知州征事當作梁州知北事

二年驤伐越巂又分伐朱提

三年獲太守西夷校尉李釗

夏進伐寧州大敗於螳螂還

初氏王楊茂搜子難敵堅頭爲劉曜所破奔晉壽晉壽守將李  
稚蕩第二子也受其賂遺不送成都曜旣引還稚遣難敵兄弟還武  
都遂卽叛稚稚悔失計連白雄求伐氏雄許之羣臣多諫雄不從遣  
稚兄瑤以侍中中領軍統稚攻難敵由白水道當作入壽遣當作遣  
與稚弟珩由陰平入二道討氏難敵等先拒壽珩珩壽不進而瑤稚  
逕至下辨以深入無繼大爲氏所破稚瑤皆死死者千餘人雄深自  
咎責以謝百姓瑤蕩之元子有名望志尙雄欲傳以後嗣甚痛惜之

雄妻任無子養瑤弟班爲子雄自有庶子十五人羣臣上立嗣

雄曰孫仲謀割有江東伯符兆基子止侯爵國志恥之宣公舍子立  
弟君子以爲知人吾將彌縫國志之恥以繼宣公之美驥與司徒王  
達諫以爲不可雄不從 永昌元年冬立班爲太子驥泣曰亂始

於是矣 泰寧元年越蕩斯叟反攻圍任回及太守李謙遣其征

南費黑救之 咸和元年夏斯叟破 二年謙移郡民於蜀

三年冬驤死追贈相國諡曰漢獻王壽以喪還拜珩征北梁州代壽以班行撫軍將軍脩晉壽軍屯

五年拜壽都督中外諸軍大

將軍中護軍西夷校尉錄尚書總統如驤

冬壽率征南費黑征

東任邵伐巴東至建平監軍毋丘奧退保宜都

六年春壽還遣

任邵屯巴

雄以子越爲車騎住廣漢

秋壽伐陰平

冬

城涪陵

七年秋壽南征寧州以費黑爲司馬與邵攀等爲前軍

由南廣入又別遣任回子調由越巂入冬十月壽黑至朱提朱提太

守董炳固城寧州刺史尹奉遣建寧太守霍彪大姓爨深等助炳時

壽已圍城欲逆拒之黑曰料城中食少霍彪等雖至齎糧不多宜令

人入城共消其穀猶嫌其少何緣拒之彪等皆入城城久不下壽欲

急攻之黑諫曰南

當有中

道險俗好反亂宜必待其詐勇已困但當日

月制之全軍取勝以求有餘溷牢之物何足汲汲也壽必欲戰果不

利乃悉以軍事任黑

八年春正月炳彪等出降威震十三郡



三月刺史尹奉舉州委質遷奉於蜀壽領寧州南夷初平威禁甚  
肅後轉凌掠民 秋建寧州民毛衍羅屯等反殺太守邵攀特柯

太守謝恕舉郡爲晉壽破之 九年春分寧州置交州以霍彪爲

寧州建寧爨深爲交州刺史 封壽建寧王 張駿使參軍傅

穎治中張淳遺雄書勸去尊號稱藩於晉雄引見謂曰吾過爲士大

夫所推然本無心於帝王也貴州將令行河沙常所希冀進思共爲

晉室元功之臣退思共爲守藩之將掃除氛埃以康帝宇而晉室凌

遲德聲不振引領東望有年月矣會獲來貺情鈞聞至有何已已穎

淳以爲然使聘相繼巴郡嘗告急云有東軍雄曰吾常慮石勒跋扈

侵逼瑯琊以爲耿耿不圖乃能舉軍使人欣然雄之雅談多如此類

三月壽還 夏六月癸亥雄疾病卒時年六十一僞諡曰武

帝廟稱太宗凡自立三十年按十下當有一字雄以惠帝永興元年

三十一年晉書載記以爲咸和八年雄生瘍於頭六日死時年六十  
一在位三十年者別有所出耳李至校刊此書轉依載記刪去一字

不知雄卒之年載記在八年癸巳國志在九年甲午本有一歲之差也通鑑書九年六月丁卯雄卒胡三省曰載記在去年最爲明晰

冬十二月丙寅葬成都墓號安都陵也

班字世文蕩第四子

也少見養於雄年十六立爲太子好學愛士每觀書傳謂其師友天文文夔隴西董融等曰吾見周景王太子晉魏太子丕吳太子孫登文章鑒識超然卓絕未嘗不有慚色何古人之難及乎進止周旋勤於咨問但性輕躁失在田獵 甲子襲位珩來奔喪勸遣雄子越

還江陽而欲令期代己知北事班以未葬不許遣珩還涪 冬十

月癸亥期越殺班於臨次并殺班仲兄領軍都弟珩奔晉期僞諡班

曰戾太子壽追諡曰哀皇帝子幽顯爲期所殺班兄弟五人皆兵死

四人無後珩在晉歷巴郡襄陽宜都太守龍驤將軍永和三年從征

西於山陽戰死也 期字世運雄第四子也母冉賤雄妻任養爲

子少攻學問有容觀雄時令諸子各募合部曲多者纔得數百人而

期獨得千餘人爲安東將軍雄亡越自江陽來赴喪兄弟怏怏既以

班非雄所生又慮珣不利己與兄越密謀圖班太史令韓約上言宮室有陰謀兵氣戒在親戚班不悟遂因夜哭越殺班期自立以越爲相國與壽並錄尙書事進壽大都督徙封漢王使討珣於涪封越建寧王以仲尼霸爲中領軍鎮南弟保鎮西西夷校尉汶山太守從兄始征東代越皆大將軍珣走卽拜壽梁州知北事

咸熙

當作康

元

年春正月立妻閻氏爲后下赦改元玉恆

秋以司隸景騫爲尙

書令征南費黑爲司隸班舅羅演爲僕射

舅羅演與漢王相天

水上官澹謀襲期立班子幽謀泄殺

當有演字

澹并誅班母羅瑤子礪稚

妻咎

二年忌從子載多才藝託他事誅之而霸保皆暴病死於

是大臣自疑骨肉不相親而期志益廣忽慢父時公卿政刑失錯

四年夏四月壽自涪還襲期假以誅越騫爲言越請散財募民格戰期謂壽不自薄不許旣誅越騫初廢期爲邛都縣公

五月乃

殺期及誅李始等殺兄弟十餘人期死時年二十四諡曰幽王

五年徙其妻子於越嶲勢又使人就越嶲誅其子

壽字武考有

幹局愛尚學義志度少殊於諸子雄奇之自代父爲將志在功名故東征南伐每有效事雄疾病侍疾左右左右侍臣造雄顧命寄託於壽期之殺班也李始初欲附壽圖共討期壽不敢始怒說期取壽憚李珩在北欲藉壽討之故不許壽旣受漢封北伐珩告以去就利害假道故珩得由巴順水東下吳壽雖代珩鎮涪歲終當入朝覲常自危嫌輒造漢中守將張才急書告方外寇警

咸康二年冬北入

漢中破走司馬勳壽見期越兄弟十餘人年方壯大而手下有強兵懼不自全數聘命高士巴西龔壯壯雖不應恐見害不得已數見壽時岷山崩江水竭壽緣劉向之言而惡之每謀壯以自安之術壯之父及叔皆爲特所殺欲假手報讎未有其由因說立事何如舍小從大以危易安開國裂土長爲諸侯名高桓文勳流百代矣壽從之陰與長史略陽羅恆巴西解思明共謀據成都爲晉稱藩會養弟攸從

成都病還死道中乃陽言越藥殺之又詐造妹壻任調書言期越當廢壽以惑羣下羣下信之乃誓文武許賞城中資財得數千人南攻成都子勢爲開門內應遂獲期越誅其宗族十餘人兵入虜掠民家奸淫雄公主及李氏諸婦多所殘害數日乃定恆與思明及李弈王利等勸壽稱鎮西將軍益州牧成都王以壯爲長史告下又勸令送期於晉任調與司馬蔡興侍中李豔及張烈等勸壽自立壽亦生心遂背思明所陳之計稱漢皇帝尊父驤曰獻帝母咎氏曰太后下赦改元漢興以恆爲尙書令思明爲廣漢太守任調鎮北梁州知當有北事

二東羌校尉當衍此李弈鎮西西夷校尉更代諸郡及卿佐皆用宿

人及已參佐省交州以從子權爲鎮南南夷寧州於是成都諸李子弟無復秉兵馬形勢者雄時舊臣及六郡人皆斥廢也 秋七月

李弈從兄乾與大臣合謀欲廢壽壽懼使子廣與大臣盟要爲兄弟

進李閔爲征東荊州移鎮巴郡 八月天連陰雨禾稼傷損百姓

飢疫草莽臣龔壯上封事曰臣聞陰德必有陽報故于公理獄高門待封伏惟獻皇帝寬仁厚惠宥罪甚衆靈德洪洽誕鍾陛下陛下天性忠篤受遺建節志齊周霍誠貫神明而志緒違理顛覆顧命管蔡既興讒諛滋蔓大義滅親撥亂濟危上指星辰昭告天地敵血盟衆舉國稱藩天應人悅白魚登舟霆震助威烈風順義神誠允暢日月光明而論者未喻權時定制淫雨汜瀆垂向百日禾稼傷損加之飢疫百姓愁望或者天以監示陛下又前日之舉止以救禍陛下至心本無大圖而今久不變天下之人誰復分明知陛下本心者哉且玄宮之讖難知而盟誓顧違一旦疆場有急內外騷動不可不深思長久之策永爲子孫之計也愚謂宜遵前盟誓結援吳會以親天子彼必崇重封國歷世雖降階一等永爲靈德宗廟相承福祉無窮君臣銘勳於上生民寧息於下通天下之高理弘信慎之美義垂拱南面歌詩興禮上與彭韋爭美下與齊晉抗德豈不休哉論者或言二州

人附晉必榮六郡人事之不便昔豫州入蜀荆楚人貴公孫述時流  
民康濟及漢征蜀殘民太半鍾鄧之役放兵大掠誰復別楚蜀者乎  
論者或不達安固之基惜其名位在昔諸侯自有卿相司徒司空宋  
魯皆然及漢藩王亦有丞相今義歸彼但當崇重豈當減削昔劉氏  
郡守令長方仕州郡者國亡主易故也今日義舉主榮臣賴寧可同  
日而論也論者又謂臣當爲法正陛下覆臣如天養臣如地恣臣所  
安至於名榮漢晉不處臣復何爲當侔法正論者或言晉家必責質  
任及徵兵伐胡何以應之案晉不煩尺兵一國來附威卷四海廣地  
萬里何任之責胡之在北亦此之憂今平居有東北之虞縱令徵兵  
但援漢川猶差二門耳臣託附深重忘疲病之穢實感殊遇冀以微  
言少補明時常懼殞沒不寫愚心辜負恩顧謹進恹恹伏願罪戮壽  
不悅然拘前言祕藏之。九月僕射任顏雄妻弟也謀反誅并殺  
雄子豹等

五年春二月晉將伐巴郡獲李閔閔恭子也初壽許

自牛鞞以東土斷與閔執政者以為不可乃止復不益兵故覆沒閔弟豔以是怨故與朝右有隙是時壽疾病恆思明等復議奉晉計尋巴郡破壽以為附晉晉當以兵威故不能自斷遂輟計 三月拜

李弈鎮東代閔 夏建寧太守孟彥率州人縛寧州刺史霍彪於

晉舉建寧為晉遣右將軍李位都討之時權在越巂 秋又遣尙

書廣漢李攄為御史入南中攄祖毅晉故寧州刺史以向與南人有

舊故遣之攄從兄演自越巂上書勸壽歸正返本釋帝稱王壽怒殺

之 車騎將軍王韜為參軍 舊校云右車騎將軍王韜為參軍九字前後文不相屬不知記何事也今

仍舊本存此九字於後以待攷

晉康帝建元元年壽卒勢立改元太和太史令韓皓上言熒惑守心

乃宗廟不脩之譴勢乃更命祀成始祖太宗皆謂之漢勢之弟大將

軍廣以勢無子求為太弟勢不許馬當解思明固請許之勢疑與廣

有謀收當思明斬之廣自殺思明被收歎曰國之不亡以我數人在



也今其殆矣思明有智略敢諫諍馬當素得人心及其死士民無不

哀之冬李弈自晉壽舉兵反單騎突門門者射殺衆潰勢大赦境內

改年嘉寧勢驕淫不卹國事中外離心蜀土無獠原注魯皓切西南夷別族至是

始從山出自巴至犍爲梓潼布滿山谷大爲民患加以飢饉境內蕭

條三年春二月桓温伐蜀軍至青衣勢大發兵遣督堅等將之原注子感

切姓也自山陽趣合水諸將欲設伏江南以待晉兵督堅不從引兵自

江北鴛鴦碕渡向犍爲原注碕渠羈切曲岸曰碕温自將步卒直指成都督堅至

犍爲乃知與温異道還自沙頭津濟比至温已軍於成都之十里陌

堅衆自潰勢悉衆出戰於笮橋原注笮音昨中書監王嘏散騎常侍常璩

勸勢降乃夜開東門走至葭萌使散騎常侍王幼送降文於温勢至

建康封歸義侯按上文晉康帝建元元年壽卒起至此乃李至所續勢志非道將之舊也今亦不更削去

李氏自起事至亡六世四十七年正僭號四十三年按三當作二自晉惠帝光熙元

年丙寅雄稱皇帝至穆帝永和三年丁未勢降故曰正僭號四十二年也又上自惠帝永寧元年特起事歲在辛酉故曰四十七年也

蜀中亦有怪異期時有狗豕交木冬華勢時涪陵民樂氏婦頭上生角長三寸凡三截之又有民馬氏婦妊身而脅下生其母無恙兒亦長育有馬生駒一頭二身相著六耳一牡一牝又有天雨血於江南數畝許李漢家舂米自臼中跳出遽斂於箕中又跳出寫於簞中又跳出有猿居鳥巢至城下地仍震又連生毛其天譴不能詳也

譔曰特流乘釁險害雄能推亡固存遭皇極不建遇其時與期倡為禍階而壽勢終之詩所謂亂離瘼矣爰其適歸者也長老傳譙周識曰廣漢城北有大賊曰流曰特攻難得歲在玄宮自相賊終如其記先識預覩何異古人乎歷觀前世偽僭之徒縱毒虔劉未有如茲每

惟殷人丘墟之歎賈生過秦之論亡國破家其監不遠矣舊校云按常璩華陽

國志目錄第九卷及序志皆云述李特雄期壽勢志則先固有志也今諸本皆無之意其傳寫脫漏因循不錄遂失之爾今本諸通鑑所述參以載記所書續成勢志用補其闕以俟後之博洽君子云又史載散騎常侍常璩實勸李勢降桓温璩必作志者因續記此云今按據此知前勢志為李璩所續也

華陽國志卷第九



華陽國志卷第十上

先賢士女總讚

含和誕氣人倫資生必有賢彥爲人經紀宣德達教博化篤俗故太上立德其次立功其次立言品物煥炳彝倫攸敘也益梁爰在前代則夏勳配天而彭祖體地及至周世韓服將命蔓子忠堅然顯者猶鮮豈國史簡闕亦將分以秦楚希預華同自漢興以來迄乎魏晉多士克生髦俊蓋世愷元之疇感於帝思於是璽書交馳於斜谷之南東帛戔戔於梁益之鄉或迺龍飛紫閣允陟璿璣亦有盤桓利居經論皓素其耽懷道術服膺六藝弓車之招旃旌之命徵名聘德忠臣孝子烈士賢女高劭足以振玄風貞淑可以方蘋蘩者奕世載美是以四方述作來世志士莫不仰高軌以咨詠憲洪猷而儀則擅名八區爲世師表矣故耆舊之篇較美史漢而今志州部區別未可總而言之用敢撰約其善爲之述讚因自注解甄其洪伐尋事釋義略可

以知其前言往行矣

蜀都士女

嚴平恬泊皓然沈冥

嚴遵字君平成都人也雅性澹泊學業加

妙專精大易耽於老莊常卜筮於市假蓍龜以教與人子卜教以  
孝與人弟卜教以悌與人臣卜教以忠於是風移俗易上下茲和  
日閱人得百錢則閉肆下簾授老莊著指歸爲道書之宗楊雄少  
師之稱其德杜陵李強爲益州刺史謂雄曰吾真得君平矣雄曰  
君但可見不能屈也強以爲不然至州脩禮交遵遵見之強服其  
清高而不敢屈也嘆曰楊子雲真知人也年九十卒雄稱之曰不  
慕夷卽由矣不作苟見不治苟得久幽而不改其操雖隨和何以  
加諸

仲元抑抑邦家儀形

李弘字仲元成都人少讀五經不爲章句

處陋巷淬勵金石之志威儀容止邦家師之以德行爲郡功曹一

月而去子贄以見辱殺人太守曰賢者之子必不殺人放之贄自以枉語家人弘遣亡命太守怒讓弘弘對曰贄爲殺人之賊明府私弘枉法君子不誘而誅也石碯殺厚春秋譏之孔子稱父子相隱直在其中弘實遣贄太守無以詰也州命從事常以公正諫爭爲志楊子雲稱之曰李仲元爲人也不屈其志不累其身不夷不惠可否之間見其貌者肅如也觀其行者穆如也聞其言者愀如也非正不言非正不行非正不聽吾先師之所畏

子雲玄達煥乎弘聖

楊雄字子雲成都人也少貧好道家無儋

石之儲十金之費而晏如也好學不爲章句初慕司馬相如綺麗之文多作詞賦車騎將軍王音成帝叔舅也召爲門下史薦待詔上甘泉羽獵賦遷侍郎給事黃門雄旣升祕閣以爲辭賦可尙則賈誼升堂相如入室武帝讀大人賦飄飄然有凌雲之志不足以諷諫乃輟其業以經莫大於易故則而作太玄傳莫大於論語故

作法言史莫善於蒼頡故作訓纂箴諫莫美於虞箴故作州箴賦  
莫弘於離騷故反屈原而廣之典莫正於爾雅故作方言初與劉  
歆王莽董賢同官並至三公雄歷三帝獨不易官年七十一卒自  
劉向父子桓譚等深敬服之其玄淵源懿後世大儒張衡崔子玉  
宋仲子王子雍皆爲注解吳郡陸公紀尤善於玄稱雄聖人雄子  
神童烏七歲預雄玄文年九歲而卒

林生清寂莫得而名

林閻字公孺臨邛人也善古學古者天子

有轎車之使自漢興以來劉向之徒但聞其官不詳其職職惟閻  
與嚴君平知之曰此使考八方之風雅通九州之異同主海內之  
音韻使人主居高堂知天下風俗也楊雄聞而師之因此作方言  
閻隱遯世莫聞也

汜鄉忠貞社稷是經進賢爲國稽考典刑愛莫助之身殞朝傾

何武字君公鄆人也初以對策甲科爲郎歷揚兗州刺史司隸校



尉京兆尹清河楚沛太守廷尉御史大夫成帝初具三公拜大司  
空封汜鄉侯爲人忠厚公正推賢進士在楚致兩龔在沛厚兩唐  
臨司隸致茂陵何並居公位進辛慶忌皆世名賢臨州郡雖無赫  
赫之名及去民思之才雖不及丞相薛宣翟方進而正直過之哀  
帝卽位以朱博趙玄爲公卿用事免官諫大夫鮑子都亟言訟之  
丞相王嘉亦以爲慨帝復徵武爲御史大夫徙前將軍時大司馬  
新都侯王莽避帝外家丁傅氏遜位亦以列侯見徵哀帝詔博舉  
太常莽從武求舉武以莽奸人之雄不許哀帝崩王太皇太后莽  
姑也卽日引莽入收大司馬董賢印綬詔舉大司馬丞相孔光等  
逼王氏皆舉莽武與左將軍公孫祿謀曰莽五父世朝權傾人主  
必危劉氏乃舉祿祿亦舉武太后不從用莽爲大司馬莽諷有司  
劾奏皆免武就國後莽浸盛遂爲宰衡安漢公欲圖篡漢憚武與  
其叔紅陽侯王立不從元始三年因呂寬吳章事檻車徵武武自

殺衆咸冤之莽欲厭衆心諡武曰刺侯子況嗣平帝崩莽因居攝

後僭王

當作真位

叔文播教變風爲雅道洽化遷我實西魯

張寬字叔文成都人

也蜀承秦後質文刻野太守文翁遣寬詣博士東受七經還以教授於是蜀學比於齊魯巴漢亦化之景帝嘉之命天下郡國皆立文學由翁唱其教蜀爲之始也寬從武帝郊甘泉泰時過橋見一女子躐浴川中乳長七尺曰知我者帝後七車適得寬車對曰天有星主祠祀不齊潔則作女令見帝感寤以爲揚州刺史復別虵莽之妖世稱云七車張作春秋章句十五萬言

長卿彬彬文爲世矩

司馬相如字長卿成都人也游京師善屬

文著子虛賦而不自名武帝見而善之曰吾獨不得與此人同世楊得意對曰臣邑子司馬相如所作也召見相如相如又作上林賦帝悅以爲郎又上大人賦以風諫制封禪書爲漢辭宗官至中

郎將世之作辭賦者自楊雄之徒咸則之

王淵豔麗蔚若華圃

王褒字子淵資中人也以高才文藻侍宣

帝初爲王襄作樂職中和頌宣帝時又上甘泉洞簫賦帝善之令宮人誦之爲諫大夫卒

子山翰藻遺篇有厚

當作序

楊終字子山成都人也年十三已能

作雷賦通屈原七諫章後坐太守徙邊作孤憤詩明帝時與班固賈逵並爲校書郎刪太史公書爲十餘萬言作生民詩又上符瑞詩十五章制封禪書著當有春秋二外傳十二卷章句十五萬言皆傳於世者

少遷猛毅垂勳三邦

陳立字少遷臨邛人也成帝時牂柯有亂

將軍王鳳薦立爲太守克平禍亂徙守巴郡秩中二千石治有尤異又徙天水太守爲天下最天子賜黃金四十斤入爲左衛護軍

世公賦政祥瑞來同

王阜字世公成都人也太守第五倫察舉

孝廉爲重泉令有鸞鳥集於文學十餘日遷益州太守神馬出滇池河甘露降白鳥見民懷之如父母

猗歟文父叡發幼童德澹會稽道崇辟雍

張霸字伯饒謚曰文

父成都人也年數歲以知禮義諸生孫林劉固段著等宗之移家其宇下啓母求就師學母憐其稚對曰饒能故字伯饒也爲會稽太守撥亂興治立文學學徒以千數風教大行道路但聞誦聲百姓歌詠之致達名士顧奉公孫松畢海胡母官萬虞先王演李根皆至大位在郡十年以有道徵拜議郎遷侍中遂授霸五更尊禮

於文當作大學年老卒葬河南

少府委遲作卿作師

趙典字仲經成都人也太尉戒孫當作子

也

與潁川李膺等並號八俊三爲侍中自樂祿俸施貧方授國師未拜病卒

何楊研神貫奧入微

何英字叔俊郾人也

楊由字哀侯成

都人也二子學通經緯英著漢德春秋十五卷孫汶字景由亦深學初徵上日食盜賊起有效爲謁者京師旱請雨卽澍遷犍爲屬國著世務論三十篇卒楊由爲太守廉范文學范稱能治由言當有賊發頃之廣柔羌反寇殺長姚超鄉人冷豐齎酒候之值客未內由爲知其多少又言人當致果其色赤黃果有送甘橘者大將軍竇憲從太守索雲氣圖由諫莫與尋憲受誅其明如此著書十篇而卒

司農明允國憲是維

任昉字文始成都人也初爲葉令治奸賊

七十餘人遷梁相尙書令清身檢下大將軍梁冀憚之出爲魏郡徙平原歲出租稅百萬冀誅復入爲尙書令司隸校尉遷大司農卒弟愷徐州刺史亦有治名昉父循字伯度爲長沙太守得其父時爲五官事在精通也

翁君美秀牧後

當作

寤機

何霸字翁君司空武兄也爲郡戶曹

刺史王尊將之官移諸郡不得遣迎太守唯霸白宜往太守遣霸  
尊大怒霸對曰太守遣霸非倏敬也以去京師久遲知朝廷起居  
耳尊遽下車持節對之因奇霸容止辟為別駕舉秀才為屬國中  
郎將弟舊校云闕名今按當作顯見目錄舊校失考也潁川太守兄弟五人皆有名

伯騫推賢求善如飢 柳宗字伯騫成都人也初結九友共學號

九子及為州郡右職務在進賢拔致求次方張叔遼王仲曾殷智  
孫等終至牧守州里為諺曰得黃金一笥不如為伯騫所識舉茂

才為陽夏太守按當依目錄作美陽令

文侯顛印極位台衡 文侯趙戒字志伯少府典祖當作父也父定

以游俠稱戒順桓帝之世歷司徒太尉登特進屢居公輔免憂患  
於無妄之世告歸於蜀薨家

太尉頡頏志振頹綱 趙謙字彥信戒孫也歷位卿尹初平元年

為太尉時董卓秉政欲遷天子長安謙與司空荀爽固諫卓不聽

以爲車騎將軍奉大駕西幸封洛亭侯拜司隸校尉忤卓指免討  
白波賊有功封當有侯進司徒免拜尙書令太僕三年薨諡曰忠

侯

司徒繼踵僂俛權橫

趙溫字子柔謙弟以侍中與

當有大

同輦

西遷封江南亭侯兄亡初平四年拜司空未暮進司徒當世榮之  
時車騎將軍李傕與董承張濟等爭權數遷移天子溫以書切責  
於傕天子聞爲寒心尋曹公入徙天子都許政出諸侯禮待溫居  
公位十五年建安十三年薨

猶操道柄董李是讓

讓責也董卓李傕凶擅謙溫干之初文侯

與李固胡廣議立清河王蒜而冀欲立蠡吾侯趙戒脅而從之使  
李固枉死君子以爲卓傕之惡甚於梁冀謙摩卓之牙溫弄傕之  
爪雖逼權勢以道陳訓賢其祖遠矣

侍中授命分節亦彰

常洽字茂尼江原人也自荊州刺史遷京

兆尹侍中長水校尉以兵衛大駕西幸催等作難常侍衛天子左  
右為催所煞

蠻夷猾擾倡亂南疆子恭要傳醜穢于攘

楊竦字子恭成都人

也永

當作元

初中越巂永昌夷反殘破郡縣衆十萬餘刺史張喬以

竦勇猛授從事任平南中竦先以詔書告諭不服乃加誅煞虜三  
萬餘人獲生口千五百人財物四千萬降夷三十六種舉正奸濁  
長吏九十人黃綬六十人南中清平會被傷卒喬舉州弔贈列畫

東觀

伯春孟元匡正時君

張充字伯春

李晃字孟元江原人也

充為治中從事時刺史恃豪每見從事布席地坐己自安高牀上  
充入閣不肯進刺史寤乃更禮從事刺史辟公孫特大姓犍為李  
威橋稚充曹舊校云闕事節時有水災倫受刺史指以漢中斗平不足表  
聞晃固爭之後刺史至與倫不平求郡短劾倫不言水災晃對以



詔書上災異不得由州倫遷司空辟兗掾舊校云兗居希切說文微也殆也兗古字今作

楊羅為令遺愛在民 楊班字仲桓成都人也 羅衡字仲伯

鄆人也俱師徵士何初山按初山當作幼正後漢書楊序傳注何萇幼正是也班為不韋茂

陵令治化浹洽徙西城閭中令號時名宰衡為萬年令路不拾遺

人家牛馬皆繫道邊曰屬羅公三府爭辟拜廣漢長二縣皆為立

祠

小伯温恭預圖息紛 陳湛字小伯成都人也歷數縣令民皆懷

服州辟治中從事廣漢太守遣子詣州脩歡交使君欲納湛諫不

可失羔羊義使君從之後有言州郡私交者考之無得乃明也

孟由至孝遐葉晞風 禽堅字孟由成都人也父信為縣史當作使

越巂為夷所得傳賣歷十一種去時堅方妊六月生母更嫁堅壯

乃知父湮沒鬻力傭賃求碧珠以求父一至漢中三出徼外周旋

萬里經六年四月突瘴毒狼虎乃至夷中得父父相見悲感夷徼  
哀之卽將父歸迎母致養州郡嘉其孝召功曹辟從事列上東觀  
太守王商追贈孝廉令李苾爲立碑銘迄今祠之

仲昱勉師

仲昱成都人也少受學於嚴季后季后爲汶江尉書

呼仲昱仲昱許十月往會夷反斷道仲昱期於往經度六七幾死  
數年卒得至汶江爲季后陳策俱得免難遠近嘆之

叔本慕仁

任末字叔本新繁人也與董奉德俱學京師奉德病

死推鹿車送其喪師亡身病齋棺赴之道死遺令勅子載喪至師  
門敘平生之志也

伯禽證將

朱普字伯禽廣都人也爲郡功曹太守與刺史王冀

有隙枉見劾普詣新都獄掠笞連月肌肉腐臭惡同死人證太守  
無事勅其子曰我死載喪詣闕使天子知我心事得情理普以烈

聞

文寺代君

李馨字文寺嚴道人也爲長章表主簿旄牛夷叛入  
攻縣表倉卒走鋒刃交至馨傾身捍表謂虜曰乞煞我活我君虜  
乃煞之表得免太守嘉之圖象府庭

在三義敦終始可稱

人生於三事若一君父師也言人靡不有

初鮮克有終普馨可謂能終始也

炎光中微巨迷僭亂

炎火光也漢以火德王自高祖至平帝十

二世國嗣三絕平帝早崩安漢公王莽字巨君遂篡天子位稱新  
室皇帝而茂陵公孫述字子陽爲莽導江卒正遂僭號於蜀

章王刎首

章明字公孺新繁人也

王皓字子離江原人也

明爲太中大夫莽篡位嘆曰不以一身事二主遂自煞皓爲美陽  
令去莽歸蜀公孫僭號使使聘之皓乃自刎以頭付使者述慚怒  
誅其妻子

侯剛哭漢

剛字直孟新繁人也爲郎見莽篡位佯狂負木斗守

闕號哭莽使人問之對曰漢祚無窮吾寧死之不忍事非主也莽追煞之

公卿絕脰亦蹈節貫

王嘉字公卿江原人也爲郎去莽還留

當衍

蜀公孫述先閉其妻子使人徵之嘉聞王皓死歎曰吾後之哉亦自煞述慚賞其妻子

羅生美至思濟艱難述方遂非殘彼貞幹

羅衍字伯紀成都人

也爲述郎說述尙書解文卿鄭文伯使諫述降漢爲子孫福解鄭從之述怒閉二子於薄室六年二子守志不回遂幽死衍卒察孝廉徵博士

劉主割據資我英俊鴻臚淵通與道推運

何宗字彥若郫縣人

也通經緯天官推步圖讖知劉備應漢九世之運讚立先主爲大鴻臚方授公輔會卒

君肅矯矯穎類倬羣

何祗字君肅宗族人也初犍爲楊洪爲太

守李巖功曹去郡數年以爲蜀郡巖猶在官祇爲洪門下書佐去郡數年以爲廣漢洪猶在官是以西土咸服諸葛亮之能攬拔秀異也祇徙犍爲太守卒

輔漢朗捷服時之勲

張裔字君嗣成都人也汝南許文休稱其

才鍾元常輩也爲輔漢將軍丞相長史丞相北征居府統事足食足兵

太常清密邃遠鉤深

杜瓊字伯瑜成都人也師事任定祖通經

緯術藝爲太常沈默慎密稱諸生之淳

休休衆彥殊塗同臻金聲玉振蜀之球琳

休休美也衆彥言此

四十三人也易曰殊塗同歸百行齊致貴於流光顯稱揚名垂世此四十三人者雖立行不同俱以垂美如金玉之音器爲世名寶

述蜀郡人士

敬司穆穆暢始玄終

敬司馬氏女五更張伯饒妻也霸前妻有

三男一女敬司產一男撫教五子恩愛若一霸卒葬河南敬司與諸子還蜀疾病遺令告諸子曰舜葬蒼梧二妃不從汝父在梁吾自在蜀亦各其志勿違吾勅也遂葬蜀子光超稟母教爲聘士也

叔紀婉婉十媛仰風  
叔紀霸女孫也適廣漢王遵至有賢訓事姑以禮生子商海內名士廣漢周幹古朴彭勰漢中祝龜爲作頌曰少則爲家之孝女長則爲家之賢婦老則爲子之慈親終温且惠秉心塞淵宜謚曰孝明惠母

公乘氏張兩髦義崇  
公乘會妻廣都張氏女也夫早亡無子姑及兄弟欲改嫁之張誓不許而言之不止乃斷髮割耳養會族子事姑終身

助陳撫孩節篤分充  
助陳臨邛陳氏女犍爲楊鳳珪妻也鳳珪亡養遺生子守節兄弟必欲改嫁乃引刀割咽宗族駭之幾死遂全其義

二常熒熒頽構再隆

元常靡常江原人也元常廣都令常良女

適廣漢便敬賓早亡元常無子養賓族子父母欲嫁乃祝刀誓志而死靡常仲山女適成都殷仲孫家遭疫氣死亡惟靡常在十八

此二字當在死亡下讀  
死亡十八四字爲一句收葬諸喪養遺生子立美成家

紀常哀哀精感昭融

紀常常侍常洽女趙侯夫人也父遇害長

安其二兄皆先沒遺父門生翟登張順迎喪時寇賊蜂起晝夜悲哀順登得將喪無恙還時人皆以紀常精誠所感

貢羅誓志

貢羅鄆羅倩女景奇妻也奇早亡無子父愍其年壯

以許同郡何詩貢羅白書誓父不還家父使詩乃白州州告縣逼遣之羅乃訴州刺史高而許之

玳何志生

玳何鄆何氏女成都趙憲妻也憲早亡無子父母欲

改嫁何恚憤自幽乃不食旬日而死郡縣爲立石表

昭儀殉身

昭儀新繁張氏女廣漢朱叔賢妻也賢爲郡督郵建

安十九年劉主圍劉璋於成都賢坐謀外降璋以昭儀配兵將見逼昭儀自殺三軍莫不哀嘆

二姚見靈

廣柔長郫姚超二女姚妣饒未許嫁隨父在官值九

種夷反殺超獲二女欲使牧羊二女誓不辱乃以衣連腰自沈水中死見夢告兄慰曰姊妹之喪當以某日至漑下慰寤哀愕如夢日得喪郡縣圖象府庭

峩峩淑媛表圖銘旌

淑善媛婉婉也言此十二女皆圖象列傳

述蜀郡列女

右蜀郡士女讚第一

凡五十五人

四十三人  
十二人女

巴郡士女

按舊本自此脫去乃闕讚之第二也今僅能知此標題而無從補其文矣近人見舊本較張佳胤以來所刻多第十之上中兩卷謂為完書其實不然又按卷末云二州人士二百四十八人今存蜀廣漢犍為漢中梓潼共一百九十四人所闕



巴郡士女凡五十四人也士一百九十七所存者一百五十  
所闕巴郡四十七人七人也女五十一今存四十四所闕巴郡  
七人女也姓名必具在目錄而無讚者亦  
並列故不可推知今但考得其凡如此

華陽國志卷第十上



華陽國志卷第十中

廣漢士女

講學冲邃洙泗是晞胤帝紹聖庶熙疇咨

楊宣字君緯什邡人

也少受學於楚國王子張天文圖緯於河內鄭子侯師楊公叔能暢鳥言長於災異教授弟子以百數成帝徵拜諫大夫帝無嗣宣上封事勸宜以定陶恭王子爲太子帝從之出宣爲交州牧太子卽位爲哀帝拜河內太守徵太倉令上言宜封周公孔子後帝從之封周公孫相如爲褒魯侯孔子後孔均爲褒成侯又薦遼東王綱瑯琊徐吉太原郭越楚國龔勝等宜讚隆時雍平帝時命持節爲講學大夫與劉歆共校書居攝中卒門生河南李吉廣漢嚴象趙翹等皆作大儒

長伯撫遐聲暢中畿析虎命邦綽有餘徽

鄭純字長伯鄆人也

爲益州西部都尉處地金銀琥珀犀象翠羽出作此官者皆富及

十世純獨清廉毫毛不犯夷漢歌嘆表聞三司及京師貴重多薦  
美之明帝嘉之乃改西部爲永昌郡以純爲太守在官十年卒列  
畫頌東觀

三老泱泱實作父師

楊統字仲通新都人也事華里先生炎高

高戒統曰漢九世王出圖書與卿適應之建武初天下求通內讖  
二卷者不得永平中刺史張志舉統方正司徒魯恭辟掾與恭共  
定音律上家法章句及二卷解說遷侍中光祿大夫以年老道深  
養於辟雍授几杖爲三老卒內讖二卷竟未詳

平仲淑道殆乎庶幾

王祐字平仲鄴人也少與雒高士張浮齊

名不應州郡辟命司隸校尉陳紀山名知人稱祐天下高士年四  
十二卒弟獲志其遺言撰王子五篇東觀郎李勝文章士也作誄

方之顏子列畫學官

舊校云獲一作灌

文父明洞探蹟索微

楊序字仲桓統仲子也道業侔父三司及

公車連徵辟拜侍中上言四方及荆揚交州當兵起人民疫蝗洛

陽大水宮殿當災三府當免舊空二格當是陰臣二字見後漢書近戚謀變皆效驗

大將軍梁冀秉權自退舊空六格當是歸家遂條黃老六字見後漢書授門徒三千人本

初元年及建和中特徵聘不行年八十三卒天子痛惜詔諡曰文

父弟子維昭約節宰縣竹寇懼文儀蜀郡何萇幼正侯祈升伯巴

郡周舒叔布及任安董扶等皆徵聘辟舉馳名當世

元章玄泊韜光匿耀當作輝段翳字元章新都人也明經術妙占

未來常告大渡津口曰某日當有諸生二人荷擔問翳舍處者幸

為告之後竟如其言又有人從冀州來學積年自以精究翳術辭

去翳為筒作書封頭與之告曰有急發之至葭萌爭津吏搗從者

頭諸生發筒筒中有書曰到葭萌爭津破頭以膏裹之生乃喟然

知不及翳還更精學翳常隱匿不使人知門人皆號夫子

稚子奕奕古之畏愛 王渙字稚子鄴人也初為河內温令路不

失遺臥不閉門民歌之曰王稚子世未有平徭役百姓喜遷兗州  
刺史部中肅清徵拜侍御史洛陽令聰明惠斷公平廉正抑強扶  
弱化行不犯發奸擿伏忽若有神京華密靜權豪畏敬元興元年  
卒百姓痛哭二縣弔喪行人商旅莫不祭之賈胡左威遭其清理  
制服三年洛陽弦歌之為立祠天子悼惜每下詔書德令必賜後  
嗣與卓茂等為伍

敬伯愷悌樹德播惠

王堂字敬伯鄆人也初臨巴郡進賢達士

舉孝子嚴永隱士黃錯及張璠陳髦民為立祠徙任右扶風政教  
嚴明帝舅車騎將軍閻顯大將軍竇憲中常侍江京等囑託輒拒  
之白鹿見象不以為祥徙魯相又徙汝南守舉陳蕃為功曹應嗣  
按後漢書堂傳云委功曹陳蕃又云任主簿  
應嗣此應嗣下當有脫文今無以補之也司隸校尉號知人之

鑑

叔宰濟濟以禮進退

馮顥字叔宰鄆人也少師事楊仲桓及蜀

郡張光超後又事東平虞叔雅初爲謁者儀威濟濟爲成都令遷越巂太守所在著稱爲梁冀所不善冀風州追之隱居作易章句及刺奢說脩黃老恬然終日

大匠奇暢妙監玄察盡言世規祇以隕越

翟輔字子超雒人也

少事段熲以明天官爲侍中尙書常見太史令孫懿歔歔涕泣曰圖書有賊臣孫登將以才智爲黃門開路君表相應之是以悽愴後爲京兆尹光祿大夫將作大匠上言漢四百年當有弱主閉門聽政數在三百年之閒薦故太尉龐參故司徒李邵明通三才忠正可以輔世所言每指刺疾權貴誣誅及尙書令高堂芝交搆免死著援神契經說卒家

司隸聰敏奮名後葉

郭賀字喬卿維人也初爲太守黃幸戶曹

幸有事與漢中太守李榮俱被徵賀勸幸星行詣詔獄自歸得免榮稽留詔殺之由是顯名太守蔡茂命爲主簿茂夢坐太極殿按當

作殿極見後漢書蔡茂傳章懷注云屋之大者古通呼為殿極殿梁也前書音義曰三輔閒謂屋梁為極可證上得嘉禾

三穗以問賀對曰明府位當至三公旬月茂遷司徒表賀明律令

稍遷侍中尚書僕射司隸校尉荊州刺史明帝南巡狩善其治徵

河南尹卒天子痛惜賜錢三十萬

鐔蔡翩翩交友惟賢  
鐔顯字子誦鄴人也  
蔡弓字子騫雒

人也俱攜手共學冬則侍親春行受業與張霸李郃張皓陳禪為

友共師司徒魯恭顯又與王稚子同見察孝於太守陳司空歷豫

州刺史光祿大夫侍中衛尉弓為廬江太守徵拜郎而霸郃皓禪

皆至公卿

兩李麗采文藻可觀  
李尤字伯仁  
李勝字茂通雒人也侍

中賈逵薦尤有相如楊雄之才明帝召作東觀辟雍德陽諸觀賦

銘懷戎頌百二十銘著政事論七篇帝善之拜諫大夫樂安相後

與劉珍共撰漢紀孫充有文才勝為東觀郎著賦諫當作諫見後漢書論



頌數十篇

憲父懸車

王稚字叔起堂幼子也屢拒孝廉公府十五辟公車

徵及授二千石徵以太常終不詣年八十一卒門人錄其本行諡

曰憲父癸未詔書以安車聘請會已亡

徵君肥遯

馮信字季誠鄴人也郡三察孝廉州舉茂才公府十

辟公車再徵不詣公孫述時託目青盲侍婢姦其前陽不覺述卒

以年老不出

董任循志束帛羹羹

董扶字茂安

任安字定祖緜竹人也

家居教授弟子自遠而至扶初應賢良方正詣京師宰府十辟公

車三徵再舉有道爲侍中觀漢將亂求爲屬國還蜀安察孝及茂

才公府辟公車徵皆不詣卒布衣弟子杜微何宗杜瓊皆名士至

卿佐

文表汜博提攜士彥

王商字文表廣漢人也博學多聞州牧劉

璋辟爲治中試守蜀郡太守荊州牧劉表大儒南陽宋仲子遠慕其名皆與交好許文休稱商中夏王景興輩也商勸璋攬奇拔雋甚善匡救薦致名士安漢趙韙及陳實盛先塾江龔楊趙敏黎景閔中王澹江州孟彪皆至州右職郡守又爲嚴李立祠正諸祀典在官一十年而卒

超類拔萃實惟世信

劉寵字世信緜竹人也出自孤微以明公

羊春秋上計闕下見除成都令政教明肅時諸縣多難治乃換寵爲郫令又換鄴安漢皆垂績還在成都遷牂柯太守初乘一馬之官布衣疏食儉以爲教居郡九年乘之而還吏人爲之立銘王商陳實當世貴士皆與爲友

節英亢烈仰訴鼎臣

段恭字節英雒人也少周流七十餘郡求

師受學經三十年凡事馮翊駱異孫泰山彥之章渤海紀叔陽遂明天文二卷東平虞叔雅學絕高當世遂遊於蜀恭以朋友禮待

之後爲上計掾會有司劾太尉龐參兼舉茂才孝廉參性忠正亮直爲貴戚所擯以恚發病遠近稱冤恭不能耐其枉亢疏表參忠直不當以讒佞傷毀忠正帝悟卽日召西曹掾問疾尋羊酒慰勞參忠

士遊孝淳感物悟神

姜詩字士遊維人也事母至孝母欲江水

及鯉魚膾又不能獨食須鄰母共之詩常供備子汲江溺死祕言遣學不使母知於是有涌泉出於舍側有江水之香朝朝出鯉魚二頭供二母之膳其泉灌田六頃施及比鄰公孫述平後東精爲賊掠害不敢入詩里時大荒飢精致米肉與詩詩埋之永平三年察孝廉明帝詔曰大孝入朝孝廉一切皆平之除江陽符長所居鄉皆爲之立祠

少林陰德陽報是甄

王恂字少林新都人也游學京師見客舍

有一書生困病恂隱視奄忽便絕有金十斤恂以一斤買棺木九

斤還要下葬埋之後爲大度亭長大馬一匹來入亭中又有繡被一領飛墮其前人莫識者郡縣以異恠後乘馬到雒縣馬牽恠入他舍主人問恠所由得馬恠具說其狀并及繡被主人悵然曰卿何陰德而致此恠說昔埋書生事主人驚曰是我子也姓金名彥卿乃葬之不報天彰卿德辟舉茂才除郿令宿釐亭中數有人爲鬼所煞恠上樓夜半有女子稱冤曰妾涪令妻也當之官宿此枉爲亭長所煞大小二十口埋在樓下奪取財物恠曰汝何故以恆殺人女子曰妾不得白日惟依夜愬人眠不肯應恚故殺之初來時言無衣恠以衣衣之言訖投衣而去旦召遊徼詰問具服卽收同謀十餘人煞之送涪令喪還鄉里當世稱之

仲魚謙沖

羊蒼字仲魚鄴人也父爲交州刺史卒官蒼迎喪不

敢取官舍一物郡三察孝廉公府辟州別駕皆不應太守尹奉棄刑名行禮樂請爲功曹刺史必欲借蒼自佐不得已爲別駕後爲

太守孫寶蔡茂殺諷功曹當欲渡津津吏滯停車待之三日將宿中亭中有縣吏引車避之爲野王令

雲卿安貧

朱倉字雲卿什邡人也受學於蜀郡張寧澹豆飲水

以諷誦同業憐其貧資給米肉終不受著河洛解家貧恆以步行爲郡功曹每察孝廉羞碌碌詣公府試不就州辟治中從事以諷詠自終

伯式玄照

折像字伯式維人也其先張江爲武威太守封南陽

折侯因氏焉父國爲鬱林太守家貲二億故奴婢八百人盡散以施宗族卹贍親舊葬死弔喪事東平虞叔雅以道教授門人朋友自遠而至時人爲諺曰折氏客誰朱雲卿段節英中有佃子趙仲平但說天文論五經

孟宗當仁

杜真字孟宗緜竹人誦書百萬言兄事翟圃圃免後

尚書令與司隸校尉枉劾之復徵詣獄真上章救之受掠笞六百

獄中明醜無事京師壯之以漢道微散財施宗族不應公府辟命  
及辟長吏候迎每交於門乃斷髮以自絕

味道好施清風邁倫  
讚仲魚以下也

漢儒請雨精感慶雲  
諒輔字漢儒新都人爲郡五官掾時天大

旱請雨不降輔出禱祈乃積薪祝神曰不雨則欲自焚爲貪叨吏

謝罪百姓言終暴雨

韓揆義烈  
韓揆字伯彥緜竹人也爲令錡裒主簿值黃巾賊入

界扶裒走入草中裒遣求隱翳處未還裒爲賊所得見害揆殞殮

葬埋訖詣從事賈龍求兵討賊賊破曰本報令君而苟自活非忠

乃自煞

喬雲勇震  
左喬雲緜竹人也少爲左通所養爲子通坐任徒徒

逃吏欲破通牘通無壯子故爲吏所侵喬雲時年十三喟然憤怒

以銳刀煞吏解通走將令出追初聞以爲壯士及知是小兒爲之

流涕

楊寬證將烈播友人

寬字叔仲新都人也父斌證令萬世太守

殺諷以忠義壯聞寬爲郡吏鄉人馬閏章言太守五方寬與兄皆詣獄證之得理後方當遷南郡閏復章之寬乃發閏臨私事閏伏罪友人汝錕爲張明所煞寬怒縛明送錕家使自謝之也

甯叔執仇

甯叔字茂泰廣漢人與友人張昌共受業太學昌爲

河南大豪呂條所煞叔煞條自拘河南獄順帝義而赦之

張復師讎

張鉗字子安廣漢人也師事犍爲謝裒裒死負土成

墳三年裒子爲人所煞鉗復其讎自拘武陽獄會赦免當世義之賈爲士死分侔虞朱

賈栩字元集什邡人也雒孟伯元爲父復

讎聞栩名往投之雒縣追伯元蹤栩嘆曰士以義遇我豈可倍哉

煞雒縣

當有脫文

必移什邡負我君乃自煞李勝言

當作謀

之以方虞卿

魯之

當行朱家

郭玉通直當作術

蓋亦所脩

郭玉字通直

按當衍三字後漢書玉傳無字可證

新都

人也明方術伎妙用針作經方頌說官至太醫丞校尉

當衍二字後漢書玉

傳無可證

爰迄劉氏司農含章爽朗翠粲觀國之光

秦宓字子勅緜竹人

也初隱遁不應州郡之命丞相亮領益州牧選為別駕中郎將吳使張温將反命亮率百官餞之温與宓語荅問若嚮應聲辭義雅美温大敬服以為蜀之有宓猶魯有仲尼也遷長水校尉司農宓甚有通理弟子譙周具傳其業

李王四子並作琳瑯

李朝字永南弟邵字偉南鄴人也王士字

義強從弟甫字國山文表諸弟也先主領牧朝為別駕羣下上先

主為漢中王其文朝所造也

當有脫文按李邵事在陳壽季漢輔臣贊注中但恐道將之文不全同今

無以補之也

後丞相亮府辟西曹掾亦有文才兄弟三人號三龍士歷

宕渠犍為益州太守甫善言議

舊校云闕按陳壽輔臣贊注云好人流言議當無所闕舊校誤耳



人流美稱自縣竹令爲州右職

優遊容與特進太常

鐔承字公文鄴人也歷郡守州右職爲少

府太常時費姜秉政孟光來敏皆棲遲承以和獨立特進之也

從事烈至諫君刎首

王累新都人也州牧璋從別駕張松計遣

法正迎先主主簿黃權諫不納累爲從事以諫不入乃自刎州門以明不可

鄭度進規忠謀莫受雖云天時抑由人咎

度縣竹人也先主自

葭萌南攻說牧璋曰左將軍懸軍襲我野穀是資急驅巴西梓潼民由涪水以南一切燒除野穀固壘待之彼請戰不許久無所資不過百日必當面縛先主聞而惡之璋不納言雖在天亦由璋之愚

永年負才自喪世主

彭蒙字永年廣漢人有俊才劉璋時坐事

爲徒及先主入自託龐統爲州右職失主意左遷江陽太守蒙望

諸葛亮以為心大志廣難可保勸先主因事誅之

漢南哽哽天奪其守

李邈字漢南邵兄也牧璋時為牛鞞長先

主領牧為從事正旦命行酒得進見讓先主曰振威以將軍宗室

肺腑委以討賊元功未効先寇而滅邈以將軍之取鄙州甚為不

宜也先主曰知其不宜何以不助之邈曰匪不敢也力不足耳有

司將殺之諸葛亮為請得免久之為犍為太守丞相參軍安漢將

軍建興六年亮西征馬謖在前敗績舊無此敗績二字三國志注引有者是亮將殺

之邈諫以秦赦孟明用霸西戎楚誅子玉二世不競失亮意還蜀

十三年亮卒後主素服發哀三日邈上疏曰呂祿霍禹未必懷反

叛之心孝宣不好為殺臣之君直以臣懼其偏主畏其威故姦萌

生亮身杖強兵狼顧虎視舊作臣三國志注引作視五大不在邊臣常危之今

亮殞歿蓋宗族得全西戎靜息大小為慶後主怒下獄誅之

誅誅彥造或哲或友昭德音芳垂名厥後

總讚此四十六人也

述廣漢人士

任母治內子成名賢

任安母姚氏也雍穆閨門早寡立義資安

遂事大儒安教授每爲賑卹其弟子以慰勉其志於是安之門生

益盈門

龐行養姑婦師之先

龐行姜詩妻也事姑晝夜紡績以給供養

子汲江溺水死祕言遣詣學常作冬夏衣投水中託言寄與子詩呼妻使爲姑舂應命遲見遣不敢遠去遊於外供給因鄰母致姑勅還

依依義舊抗疏拜庭誠感世主徙女輟刑

義舊狄道長姜穆女

縣竹司馬雅妻也旣許婚父坐事徙朔方雅就婚死雇人送其喪尋父母死朔方義舊獨與弟孤居十年士大夫求終不肯乃上疏自訟求還鄉里天子愍悼下朔方使送遂下詔書定律令女子許嫁不得從父母徙

紀配斷指以章厥貞

紀配廣漢殷氏女廖伯妻也年十六適伯

伯早亡以己有美色慮人求己作詩三章自誓心而求者猶衆父母將許乃斷指明情養子猛終義太守薛鴻圖象府庭

彭王進娥殘體令誠

彭非廣漢王輔妻也王和新都人便敬妻

也李進娥鄴人馮季宰妻也輔早亡叔父欲改嫁非乃詣太守五方截髮自誓敬亦早亡和養孤守義蜀郡何玉因媒介求之兄曉喻以公族可憑和恚割其一耳季宰亦早亡父母欲改嫁進娥亦剪髮自誓各養子終義

正流自沈玉潔冰清

正流廣漢李元女楊文妻也適文有一男

一女而文沒以織履爲業父欲改嫁乃自沈水中宗族救之幾死得免太守五方爲之圖象

相烏袁福義不存生

相烏德陽人袁稚妻也十五適稚二十稚

亡無子父母欲改嫁之便自殺袁福亦德陽人王上妻也有二子

上以喪親過哀死福哀感終身父母欲改嫁乃自殺

汝氏世胄由婦謙柔

汝敦妻某敦兄弟共居有父母時財嫂心

欲得妻勸送二兄敦盡讓田宅奴婢與兄自出居後敦耕得金一器妻復勸送二兄夫妻共往嫂性恠嗇謂欲借貸甚不悅及見金踊躍兄感悟卽出妻讓財還弟弟不受相讓積年後並察孝廉世爲冠族

思媚列媛美稱惟休

總讚十一人也

述廣漢列女

右廣漢郡士女讚第三

凡五十七人四十六人  
士人女

犍爲士女

王延河平纂禹之功

王延世字長叔資中人也建始五年河決

東郡汜濫兗豫四郡三十二縣沒官民屋舍四萬所御史大夫尹

忠以不憂職致河決自煞漢史案圖緯當有能循禹之功在犍柯之資陽求之正得延世徵拜河堤謁者治河以竹落長四丈大九圍夾小船載小石治之三十六日隄防成帝嘉之改年曰河平封延世關內侯拜光祿大夫仍賜黃金百斤

文伯習禮繼武孫通

董鈞字文伯資中人也少受業於鴻臚王

臨永平初議天地宗廟郊祀儀禮鈞與太常定其制又定諸侯王喪禮歷城門校尉五官中郎將以儒學貴稱繼叔孫通

張公執憲克智克聰極位青紫實作司空

張皓字叔明武陽人

也以文

按此下當有脫字

聰明辟大將軍掾遷尚書僕射彭城相進隱士

閻丘遷等徵拜廷尉延光三年安帝將廢太子爲濟陰王皓與太常桓焉太僕來歷爭之安帝不許及安帝崩濟陰得立爲順帝以皓爲司空久之免復徵爲廷尉清河趙騰坐謗訕當誅所引八十餘人皓以聖賢明義爭之咸稱平當

子鸞司京桴鼓不鳴  
趙旂字子鸞資中人也初臨甘陵弘農郡

甚善治民徵尚書遷司隸校尉時梁冀子弟放恣旂以法繩之不

敢爲非京師肅清桴鼓不鳴

孟文翹翹平

當作平

顯有成

楊渙字孟文武陽人也以清秀博雅

歷臺郎相稍遷尚書中郎司隸校尉甚有嘉聲美稱

伯邳正直耀祖揚聲

楊準

按準當作淮下同隸續引作淮不誤

字伯邳漢安縣人

也初爲郡守太尉李固薦準累世忠直拜尚書太傅陳蕃表爲河

東入爲尚書令奏書治南陽太守曹麻潁川太守曹騰濟南太守

孫訓等子弟依託形勢淫縱徵廷尉治罪訓梁冀婦家子也於是

憚之又薦朱禹盛精滕延爲尚書陸稠爲郡守皆名士也桓帝卽

位拜河南尹遷司隸校尉冀叔父梁忠爲執金吾不朝正初劾奏

之朝士服其公亮徙將作大匠

翁君將命迺播其名

楊莽字翁君武陽人爲功曹刺史王尊當

之州移書諸郡不得遣迎惟健爲遣莽蜀郡遣何霸嚴尊尊大怒  
莽前對曰使君不使奉迎謙也太守承迎敬也謙敬上下之節不  
可廢也尊乃欣然請辟別駕舉茂才官至揚州刺史

奉君遜世

費貽字奉君南安人也公孫述時漆身爲厲佯狂避

世述破爲合浦守蜀中歌之曰節義至仁費奉君不仕亂世不當  
避惡君脩身於蜀紀名亦足後世爲大族

任公開明

任永字君業棘道人也長歷數王莽時託青盲公孫

述時累徵不詣子溺井中死見而不言妻淫於前面而不怪述平  
乃曰世適平目卽清妻自煞光武徵之以年老不詣卒

叔和順終

杜撫字叔和資中人也少師事薛漢治五經教授門

生千人太守王卿召爲功曹司徒辟不當有詣字及聞公免必往承問

東平憲王爲驃騎將軍辟西曹掾後罷爲王師在驃騎府者遣之  
數年乃去數應三公徵撫侍送故公作詩通議說弟子南陽馮良



亦以道學徵聘

君橋密精

趙松字君橋武陽人爲童子數資問費貽及知其避

世密與周旋終不露之也述平舉茂才爲上黨太守

英英四子利於居貞

讚費貽以下

皇漢弛綱官人失紀文紀謬表明臧否

張綱字文紀司空皓

子也在漢

當衍

朝公平廉正權宦側目憚之漢安元年以光祿大夫

持節與侍中杜喬循行州郡考察風俗出宮埋車先奏太尉桓焉

司徒劉壽尸祿素餐不堪其職出城又奏司隸校尉趙峻河南尹

梁不疑汝南太守梁乾等贓污濁亂檻車送廷尉治罪天子以乾

梁冀叔父貶秩免峻等又奏魯相寇儀儀自殺威風大行郡縣莫

不肅懼還冀恨之出爲廣陵太守承叛亂後懷集撫卹甚有治化

在官十

當作一

年卒子續尚書續弟方爲豫州牧子孫數世至大官

白虜狂僭亂離斯圯孝仲繫馬社稷是死

朱遵字孝仲武陽人

也公孫僭號遵為犍為郡功曹領軍拒戰於六水門衆少不敵乃  
埋車輪絆馬必死為述所殺光武嘉之追贈復漢將軍郡縣為立

祠

建侯弔梁志効知己 趙敦字建侯武陽人也初為新都令德禮

宣流三司及大將軍梁冀累辟終不詣冀辟書不絕後冀自殺使  
者監守不使人弔問敦獨往弔祭訖自拘有司天子赦之

叔通敦孝石生江汜 隗相字叔通棘道人也養母至孝母食欲

江中正江水相冬夏汲之一朝有橫石生正流中哀帝世為孝廉

平帝時為郎

吳生致養亦感靈祉 吳順字叔和棘道人也事母至孝赤烏巢

其門甘露降其戶察孝廉永昌太守

劉后初載實多良才季休忠亮經事能治 楊洪字季休武陽人

也先主領牧為部屬當作蜀部從事及征漢中丞相亮表為蜀郡太守

先主疾病永安召亮東行漢嘉太守黃元反後主用其計克元封

關內侯後爲中郎將越騎尉按當作後爲忠節將軍越騎校尉見三國志忠清公亮甚

信任之舊此下空十三行按當無所闕舊未必是也

德山耽學道以光時 伍梁字德山南安人也儒學雅尙州選迎

牧諸葛亮爲功曹遷五官中郎將

烈武作合度曠塗夷惜哉公舉帥直陵遲 費詩字公舉南安人

也先主領牧爲前部司馬羣臣勸先主稱尊號詩上疏曰殿下以

曹操父子逼主篡盜故乃羈旅萬里糾合士衆將以討賊今大敵

未尅而先自立恐人心疑惑昔高祖獲子嬰疑尙推讓況未出門

便欲自立耶以是左遷部永昌從事建興三年從丞相亮南征魏

將李鴻來降說魏新城太守孟達欲背魏向蜀亮方北面欲招達

爲外援欲與書詩進曰孟達小子昔事振威不忠後事先帝背叛

反覆之人何足與書也亮嘿然詩終劉氏之世官位不盡其才君

子以昭烈之弘曠武侯之明達詩吐直言猶尙凌遲沉庸主昏世率意直言而望肆効者哉

文然簡略言不詭隨

楊義當作義

字文然武陽人也輔漢將軍張

裔薦爲丞相亮主簿大司馬蔣琬辟東曹掾歷二郡太守爲射聲校尉性簡略未曾以甘言加人酒後言笑多慢詞失大將軍姜維意爲維所廢延熙十八年作季漢輔臣讚在蜀書

車騎快快與國安危

張翼字伯恭文紀孫也以文武才幹歷征

西鎮南大將軍封亭侯延熙十八年與大將軍姜維西征大破魏雍州刺史王經於狄道經衆死洮水者數萬人維欲進翼諫不可必進無功時維屢出隴西翼常廷爭以爲國小不宜黷武必爲蛇畫足不聽不得已每快快從行景耀元年遷左車騎將軍領冀州刺史蜀平後死

猗猗衆偉芳烈名垂方德繹勳健之瓊瑰

總讚此二十一人也

述健爲人士

進楊穆穆先姑是憲

進武陽楊氏女大匠廣漢王堂長子博妻

也博後母文有母儀之德進楊則其教爲行閨門雍穆梓柯太守

李禕家亦假係

當作繼

每不和嘆恨徒富貴學問不及博家也

陽姬請父厥族蒙援克諧內愛訓及秀彥

姬武陽人也生自寒

微父坐事閉獄楊渙始爲尙書郎告歸郡縣敬重之姬爲處女乃

邀道扣渙馬訟父罪言辭慷慨涕泣渙懇告郡縣爲出其父因奇

其才爲子文方聘之結婚大族二弟得仕宦遂世爲宦門後文方

爲漢中太守以趙宣爲賢將察孝廉函封未定病卒姬祕不發先

遣孝廉上道乃發喪宣得進用姬之力也後文方兄子伯邳爲司

隸校尉時姬長子穎伯冀州刺史仲子頰二千石伯邳以稟叔母

教迎在官舍每教伯邳政治伯邳欲舉茂材選有二人伯邳欲用

用老者嫌以其耄欲舉五方而其年幼以咨叔母勸舉方後趙宣

爲健爲五方爲廣漢姬尙在故吏敬之四時承問不絕

周度割體貞節是全

周度棘道人也相登妻十九登亡中牟令

吳厚因人求之斷髮以誓志後人猶欲求之乃割其鼻養子早亡其妻左亦年十九遂俱守義世咸嘆婦姑之貞專其節操也

敬姬沈淵誠烈邈然

曹敬姬南安人也周紀之妻十七出適十

九紀亡遺生子元餘服闋父母以許孫賓給母病迎還知之自投水人赴之氣已絕一日一夜乃蘇息送依紀第居訓導元餘號爲學士年九十卒

貞玦玉操彌久彌刊

貞玦字瓊玉牛鞞程氏女張惟妻也十九

適惟未暮惟亡無子養兄子悅供養舅姑夙夜不怠資中王冲欲娶玦玦叔父肱荅以女志不可奪冲爲太守李巖督郵巖記縣遣孝義掾奉羔鴈宣太守命聘之玦乃自投水救援不死後太守蘇高爲立表太守蜀郡舊校遺仁恕掾論曰貞玦太守章陵劉威又

爲作頌故稱述也

韓姜自財后旌其寃

韓姜棘道人尹仲讓妻也二十讓亡服除

資中董臺因從事王爲表弟求姜不許臺門生左習王蘇以爲姜

可奪教姜家言母病迎還韓氏因逼成婚姜聞故自殺太守巴郡

弓楊哀之殺習蘇以報姜死

謝姬引決同穴齊定

字誤未詳本或作寃

姬南安人武陽儀成妻也成死

以己年壯無子將葬乃預作殯殮具毒藥須夫棺入墓拊棺吞藥

而死遂同葬縣以表郡郡言州州上尚書天子咨嗟下書每大赦

賜家帛四匹藟

字誤未詳本或作蜀藟

穀二石

媛姜匹婦勉夫濟子授命圉圍義踰國士

趙媛姜資中人盛道

妻也建安五年道坐過夫婦閉獄子翔方年五歲姜謂道曰官有

常刑君不得已矣妾在復何益君門戶君可同翔亡命妾代君死

可得繼君宗廟道依違數日姜苦言勸之遂解脫給衣糧使去代

為應對度走遠乃告吏殺之後遇赦父子得還道雖仕宦當世痛

感終不更娶翔亦不仕耳末耳字衍文

黃帛求喪沈身中流靈精相感攜夫共浮 黃帛棘道人張貞妻

也貞受易於韓子方去家三十里船覆死貞弟求喪經月不得帛

乃自往沒處躬訪不得遂自投水中大小驚晚積十四日持夫手

浮出時人為語曰符有先絡棘道帛求其夫天下無有其偶縣長

韓子冉嘉之召帛子幸之縣股肱

烈哉諸媛節稱義遵當作道讚此九女也

述犍為列女

右犍為士女讚第四

凡三十人二十一人士九人女

華陽國志卷第十中



華陽國志卷第十下

漢中士女

鄭真岳峙確乎其清

鄭子真褒中人也玄靜守道履至德之行

乃其人也教曰忠孝愛敬天下之至行也神中五徵帝王之要道

也成帝元舅大將軍王鳳備禮聘之不應家谷口世號谷口子真

云漢中與立祠

舊校云神中五徵未詳其義

衛梁泥盤玄湛淵亭

衛衡字伯梁南鄭人也少師事隱士同郡

樊季齊以高行聞郡九察孝廉公府州十辟公車三徵不應董扶

任安從洛還過見之曰京師天下之市朝也足下猶之人耳何其

在遠以虛名屢動徵書若至中國則價盡矣衡笑曰時有險易道

有污隆若樊季齊楊仲桓雖應徵聘何益於時乎苟無所則尼軻

栖栖是以君平子真不屈其志豈子之徒也哉吾何虛假之有安

扶服之敬其言也

鄧公亢對忠枉原情

鄧公成固人也景帝時御史大夫晁錯患

諸侯強大建議減削會吳楚七國謀反假言誅錯故吳相袁盎譖  
帝殺之拜盎太常使赦七國七國遂叛鄧公爲謁者入言軍事帝  
問曰七國聞晁錯死罷兵不對曰吳王卽山鑄錢煮海爲鹽謀反  
積數十年錯患之故欲削弱爲萬世策諸侯憂之計畫始行身死  
東市諸侯莫憚內杜忠臣之口外爲諸侯報怨臣竊爲陛下不取  
也帝嘆息曰吾亦恨之武帝初爲九卿

博望致遠西南來庭

張騫成固人也爲人強大有謀能涉遠爲

武帝開西域五十三國窮河源南至絕遠之國拜校尉從討匈奴  
有功遷衛尉博望侯於是廣漢緣邊之地通西南之塞豐絕遠之  
貨令帝無求不得無思不服至今方外開通騫之功也

子游師生讒巧所傾

張猛字子游騫孫也師事光祿勳周堪以

光祿大夫給事中侍元帝帝當廟祭濟渭欲御樓船御史大夫薛

廣德當車免冠乞頸血污車輪陛下不得廟祭矣帝色不悅猛進曰主聖則臣直今乘船危就橋安聖主不乘危故大夫言之帝曰曉人不當如是也後與周堪俱以忠正爲幸臣弘恭石顯所譖毀乍出乍徵堪平和猛卒自殺

王孫養性矯葬厲生

楊王孫成固人也治黃老家累千金厚自

奉養臨終告其子曰我死裸葬以復吾真但爲布囊盛尸入地七尺既下從足脫之以身親土其子不忍見王孫友人祈侯諫之王孫曰厚葬無益死者也夫俾財送死今日入明日發此真無異暴骸中原裹以幣帛隔以棺槨含以珠玉後腐朽乃得歸土不可故吾欲早就真宅祈侯無以易卒裸葬如其言

司徒監使術暢思精屢登上司七政是經

李郃字孟節南鄭人

也少明經術爲郡候吏和帝使者二人微行至蜀宿郃候舍郃爲出酒夜飲露坐郃問曰君來時寧知二使何日發來耶二人怪問

之郤指星言曰有二使星入益部後一人為漢中太守命為功曹  
察孝遂馳名為尚書郎徙左丞稍遷至尚書僕射尚書令拜司空  
又進司徒清公直亮當世稱名順帝世薨

炎精下頽朱明不揚太尉審諤任國救荒濯日暘谷將升扶桑惡直  
醜正漢道遂喪 李固字子堅郃子也陽嘉三年以對策忠亢拜

議郎大將軍梁商后父也表為從事中郎授荊州刺史直州部有

亂至州先友其賢者南陽鄭叔躬宋孝節零陵支宜雅表薦長沙

桂陽太守趙歷卒當作辛已奏免江夏南按此下當脫陽南二字南

固本郡太守孔疇高賜為昆舊校云為昆疑誤今按為姓名南

云漢有南郡太守為昆舊校失之遠矣等州土自然安靜徙太山太守克寧盜賊入

為將作大匠多致海內名士南陽樊英江夏黃瓊廣漢楊厚會稽

賀純光祿周舉侍中杜喬陳留楊倫河南尹存東平王惲陳國何

臨清河房植等皆蒙徵聘轉大司農順帝崩太后臨朝拜太尉與

后弟大將軍梁冀太傅趙峻並錄尚書沖帝崩時徐揚有盜賊太后欲不發喪須召諸王至固爭不可言國家多難宜立長君太后欲專權乃立樂安王爲質帝質帝崩太后復與梁冀謀所立固與司徒南郡胡廣司空蜀郡趙戒書與冀引周勃霍光立文宣以安漢之榮閹鄧廢立之禍言國統三絕期運厄會興崩之漸在斯一舉宜求賢王親近不可寢嘿也冀得書召公卿列侯議所立三公及鴻臚杜喬僉舉清河王蒜冀然之奏御太后中常侍曹騰私恨蒜說冀明日更議廣戒從冀固與喬必爭蒜宜立中興才也且年長識義必有厚將軍冀不聽策免固喬歲餘取下獄以無事出之京師市邑皆稱千萬歲冀惡其爲人所善更奏繫之固書與二公曰吾欲扶持漢室使之比隆文宣何圖梁將軍迷謬諸子曲從以吉物爲凶成事爲敗漢家衰微從是始矣將軍亦有不利吾雖死上不慚於天下不愧於人求義得義死復何恨遂自殺二公得書

惟自流涕士民咸哀哭之桓帝無道冀尋受誅漢家遂微政在閭  
宦無不思固也

元脩敦重威惠實亮

張則字元脩南鄭人也為梓柯太守威著

南土永昌越巂夷謀欲反畏則換臨其郡相諫而止號曰臥虎以  
戍狄勳遷護羌校尉徵拜扶風又換臨桂陽皆平盜賊巴郡板楯  
反拜隆集校尉鎮漢中徙梁州刺史又為魏郡太守所在稱治靈  
帝崩後大將軍袁紹表為長史不就丞相曹公拜度遼將軍

子雅温恭見察文方

趙宣字子雅南鄭人也出自寒微以温良

博雅太守犍為楊文方深器異之遂察孝廉官至犍為太守

二珪琬琰三辰懸望

趙瑤字元珪琬字稚珪凡七兄弟宣子也

皆以令德著聞瑤少有公望瑤當始為緱氏袁趙二公相與書曰

趙瑤在緱氏猛虎歸迹百里均耳叔當作爾升按爾句平何難遷

扶風太守徙蜀郡司空張温謂之曰昔第五伯魚從蜀郡為司空

掃吾第以侍足下矣瑤曰諾尋換廣漢卒琰始爲青州刺史部下清肅徒梁相徵拜尙書不就卒

仲卿報友行義以理

陳綱字仲卿成固人也少與同郡張宗受

學南陽以母喪歸宗爲安衆劉元所殺綱免喪往復之值元醉臥還須醒乃煞之自拘有司會赦免三府並辟舉茂才拜弘農太守初至有兄弟自相責引退是後無訟者在官九年卒天子痛惜賜家錢四十萬

伯度玄鏡榮辱己

李法字伯度南鄭人也桓帝時爲侍中光

祿大夫數亢表宦官太盛椒房太重史官記事無實錄之才虛相褒述必爲後笑帝怒免爲庶人恬然以咎失爲己責久之徵拜汝南太守遷司隸校尉湛然無自得之容

德公在林懸象垂晷既冲雲清荀張儀准

李燮字德公太尉固

子也父死時二兄亦死燮爲姊所遣隨父門生王成亡命徐州傭

酒家酒家知非常人以女妻之延熹二年梁冀誅後日經陽道暈  
五車史官上書昔有大星升漢而西捲舌揚芒迫月熒惑犯帝座  
則有大臣枉誅星在西方大尉固應之今暈如之宜有赦命錄其  
遺嗣以除此異於是下赦燮得返舊四府並辟公車徵議郎與趙  
元珪潁川賈偉節荀慈明張伯慎為友伯慎為潁川太守與慈明  
交相論言偉節與焉京師以為臧否伯慎問趙元珪曰德公所言  
何元珪曰無言也伯慎追嘆曰當如德公兒輩徒靡沸耳慈明亦  
寤而心變拜東平相王為黃巾所沒得出天子復封之燮以為不  
可果敗遷京兆尹時人為之語曰李德公父不欲立帝子不欲立  
王

伯臺處諫師言亢盡末命防萌妙覩玄揆 陳雅字伯臺成固人

也靈帝時為諫大夫闞宦用事上疏曰昔孝和帝與中常侍鄭眾  
謀誅大將軍竇憲由是宦官秉權安帝幼冲和熹太后兄大將軍



鄧騭輔政太后適崩中常侍江京等殺騭安帝登遐黃門孫程又殺車騎將軍閻顯孝桓帝又與中常侍單超等共誅大將軍梁冀陛下卽祚太傅陳蕃大將軍竇武尙書令尹勳等欲誅宦官絕其奸擅盡忠王室建萬世策機事不密爲中常侍朱瑀等所殺此卽陛下所見今宦官強盛威傾人主天下鉗口莫敢言者海內怨望妖孽並作四方兵起萬姓辛苦陛下尙可以安柰後嗣何帝不省納出爲巴郡太守年七十五卒臨終戒其子曰期運推之天下將大亂雄夫力爭無以貨財爲意吾亡依山薄葬亡歲餘靈帝崩大將軍何進復爲黃門所殺海內果亂終成三國也

孟度邵允

閻憲字孟度成固人也名知人爲縣竹令以禮讓爲

化民莫敢犯男子杜成夜行得遺物一囊中有錦二十五匹求其主還之曰縣有明君何敢負其化童謠歌曰閻尹賦政旣明且昶去苛去辟動以禮讓遷蜀郡吏民涕泣送之以千數

季子英瑋 李歷字季子太尉固從弟也少脩文學性行清白與

鄭康成陳元方齊名弱冠拜新城令朝請都督

計君經算 程苞字元道南鄭人也光和二 years 上計吏時巴郡板

楯反軍旅數起征伐頻年天子患之訪問益州計考以方略苞對

言板楯忠勇立功先漢為帝義民羌入漢中輒蒙其力東征南戰

世有功勞由不料卹以致叛亂非有僭盜能相羣殺大兵臨之未

必卒得不如但選明能太守恩信懷服自然安定矣天子從之卒

如其言後在道卒

元靈斐斐 祝龜字元靈南鄭人也年十五遠學汝潁及太學通

博蕩達能屬文太守張府君奇之曰吾見海內士多矣無如祝龜

者也州牧劉焉辟之不得已行授葭萌長撰漢中耆舊傳以著述

終

禮高殉名 段崇字禮高南鄭人也太守河閒鄭廩命為主簿丞

初四年涼州羌反溢入漢中從廛屯褒中虜東攻廛欲戰崇諫不可願固壘待之廛不聽出戰敗績崇與門下吏王宗原展及子勃兄子伯生推鋒死戰衆寡不敵崇等皆死羌遂得廛殺之

伯義死節

按當作節死誤倒

程信字伯義南鄭人也時爲功曹居守馳

來赴難殞殮廛喪送還鄉里訖乃結故吏冠蓋子弟二十五人誓共報羌各募敢死士以待時太守鄧成命信爲五官元初二年虜復來信等將其同志率先奮討大破之信被八創死天子咨嗟元初五年下詔書賜信崇家穀數千斛

四行齊致在茲六子

讚閣憲已下也又有王宗原展及嚴孳李

容姜濟陳已曹廉勾矩劉旌九人皆以令義爲鄭廛所命王宗原展與廛同死孳容等七人與信共并命詔書旣賜崇信家又賜九子家穀各五百斛給死事復

元侯趙陳蓋亦烈士

燕邠字元侯趙嵩字伯高南鄭人也陳調

字元化仲卿孫也邠爲刺史卻儉從事使在葭萌與從事董馥張胤同行儉爲黃巾賊王饒趙播等所殺邠聞故哀慟說馥胤赴難二子不可邠歎曰使君已死用生何爲獨死之牧劉焉嘉之爲圖象學官誅馥等嵩事太守蘇固固爲米賊張脩所疾殺嵩痛之杖劍直入脩營殺十餘人幾獲脩死陳調少尙遊俠聞固死聚賓客百餘人攻脩大破之進攻脩營乃與戰以傷死

渙渙龍宗振振麟趾文炳彬蔚漢之表軌

總讚二十五人也

述漢中人士

其陳術字申伯作者舊傳者也失其行事歷新城

魏興上庸三郡太守及錫光等不列也

穆姜温仁化繼爲親

穆姜安衆令程祗妻司隸校尉李法姊也

祗前妻有四子興敦覲豫穆姜生二子淮基祗亡興等憎惡姜姜視之愈厚其資給六子以長幼爲差衣服飲食凡百如之久興等感寤自知失子道詣南鄭獄受不愛親罪太守嘉之復除門戶常

以二月八月社致肉三十斤酒米各二斛六斗六子相化皆作令  
士五人州郡察舉基字稚業特雋逸爲南郡太守

泰瑛嚴明世範厥訓

泰瑛南鄭楊矩妻大鴻臚劉巨公女也有

四男二女矩亡教訓六子動有法矩長子元珍出行醉母十日不  
見之曰我在汝尙如此我亡何以帥羣弟子元珍叩頭謝過次子  
仲珍白母請客旣至無賢者母怒責之仲珍乃革行交友賢人兄  
弟爲名士泰瑛之教流於三世四子才官隆於先人故時人爲語  
曰三苗舊校云闕止四珍復起

杜氏之教父母是遵

杜泰姬南鄭人趙宣妻也生七男七女若

元珪稚珪有望五人皆令德其教男也曰中人情性可上下也在  
其檢耳若放而不檢則入惡也昔西門豹佩韋以自寬宓子賤帶  
弦以自急故能改身之恆爲天下名士戒諸女及婦曰吾之妊身  
在乎正順及其生也恩存於撫愛其長之也威儀以先後之禮貌

以左右之恭敬以監臨之懃恪以勸之孝順以內之忠信以發之  
是以皆成而無不善汝曹庶幾勿忘吾法也後七子皆辟命察舉  
牧州守郡而漢中太守南鄭令多與七子同歲季考上計無不脩  
敬泰姬執子孫當作禮

禮珪肅穆言存典韻

禮珪成固陳省妻也楊元珍之女生二男

長娶張度遼女惠英少娶荀氏皆貴家豪富從婢七八資財自富  
禮珪敕二婦曰吾先姑母師也常言聖賢必勞民者使之思善不  
勞則逸逸則不才吾家不爲貧也所以粗食急務者使知苦難備  
獨居時二婦再拜奉教從孫奉上微慢珪抑絕之感悟革行遭亂  
流行宗表欲見之必自嚴飾從子孫侍婢乃引見之曰此先姑法  
也四時祭祀自親養牲釀酒曰夫祭禮之尊也年八十九卒惠英  
亦有淑訓母師之行者也

文姬叡敏宗祀獲歆

文姬南鄭趙伯英妻太尉李固女也父爲

梁冀所免兄憲公季公罷官歸文姬歎曰李氏滅矣乃與二兄議  
匿弟燮父門生王成亡命徐州涕泣送之謂成曰託君以六尺之  
孤若李氏得嗣君之名義參於程杵矣久之遇赦燮得還行喪服  
闋勅之曰先公爲漢忠臣雖死之日猶生之年梁冀以族弟幸濟  
豈非天乎慎勿有一言加梁氏加梁氏則連主上是又掇禍也奉  
行之從成在徐州各異處傭賃而私相往來成病亡燮四時祭之  
陳氏二謙或智或仁 陳順謙成固人也順謙適鄧令曹寧十九

寡居長育遺孤八十餘卒兄子陳規著書歎述之惠謙適張亮則  
在扶風官下吏白欲重禁嚴防以肅非元脩訪於惠謙惠謙曰恢  
弘德教養廉免恥五刑三千蓋亦多矣又何加也兄子伯思學仙  
道惠謙戒之曰君子疾沒世而不稱不患年不長也且夫神仙愚  
惑如繫風捕影非可得也伯思乃止陳伯臺稱云女尙書之後耳

嘗作俊末  
耳字衍文

禮脩順姑恩愛溫潤

禮脩趙嵩妻張氏女也姑酷惡無道遇之

不以禮脩終無愠色及寧父母父母問之但引咎不道姑卒感悟更慈愛之鄉人相訓曰作婦不當如趙伯高婦乎使惡姑知變可謂婦師矣後姑病女來省疾姑却之曰我死固當絕於賢婦手中後遭米賊嵩死乃碧塗面亂首懷刀託言病賊不逼也養遺生女依父叔立義終身者也

末者也二字衍文

樹南悼夫輕死重信

韓樹南南鄭人趙子賤妻也子賤初爲郡

功曹李固之誅詔書下郡殺固二子憲公季公太守知其枉遇之甚寬二子託服藥死具棺器欲因出逃子賤畏法勅更驗實就殺之及固小子變得還子賤慮變報仇賃人刺之變覺告郡殺子賤初樹南諫子賤子賤不從及臨死許共并命兄弟婢侍婢視守之經百餘日乃怠

當作給

白兄婢念一死萬不得生不敢復圖死也上下以爲信然無幾時於幕下自斃



祈祈令姬如玉如金允矣淑媛齊德姜任

總讚此九人也

述漢中列女

右漢中士女讚第五

凡三十四人二十五人  
九人女

梓潼人士

鎮遠敦壯立勳南瀕

文齊字子奇梓潼人也孝平帝末以城門

校尉爲犍爲屬國遷益州太守造開稻田民咸賴之公孫述時據郡不服述拘其妻子許以公侯招之不應乃遣使由交趾貢獻河北述平世祖嘉之徵拜鎮遠將軍封成義侯南中咸爲立祠子忱有令德爲北海太守

巨遊玉碎高風金振

李業字巨遊梓潼人也少執志清白太守

劉咸慕其名召爲功曹不詣咸怒欲殺之業徑入獄咸釋之公孫述累聘不應述怒遣鴻臚尹融持毒藥酒逼之業笑曰名不可毀

身可殺不可辱也遂飲藥死述恥殺善士賜錢百萬子輩逃匿不受建武中察孝廉為遂久令

文堅亟哉南面懷民

景毅字文堅梓潼人也太守丁羽察舉孝

廉司徒舉治劇為沅陽侯相高陵令立文學以禮讓化民遷太守

上計吏守闕請之三年不絕以子顧師事少府李膺膺誅自免久

之拜武

按舊此空格今補武字下文沮縣屬武都白水縣屬梓潼由武都南向益州故所經如此近本妄添成字誤之甚矣

都令遷益州太守上事吏民涕泣送之至沮者七百人白水縣者

三百人值益州亂後米斛千錢毅至恩化暢洽比去米斛八錢鳩

鳥巢其聽事孕育而去三府表薦徵拜議郎自免歸州牧劉焉表

拜都尉為人廉正疾淫祠勅子孫惟脩善為禱仁義為福年八十

一而卒

盛國好學研頤聖真

楊充字盛國梓潼人也少好學求師遂業

受古學於扶風馬季長呂叔公南陽朱明叔潁川白仲職精究七

經其朋友則潁川荀慈明李元禮京兆羅叔景漢陽孫子夏山陽王叔茂皆海內名士還以教授州里常言圖緯空說去事希略疑非聖不以爲教察孝廉爲郎卒

漢伯肄業諸生之純

景鸞字漢伯梓潼人也少與廣漢郝伯宗

蜀郡任叔本潁川李仲

當脫一字

渤海孟元叔遊學七州遂明經術還

乃撰禮略河洛交集風角雜書月令章句凡五十萬言太守

舊校云闕

貺命爲功曹察孝廉舉有道博士徵不詣然上陳時政言經得失又戒子孫人紀之禮及遺令期死葬不設衣衿務在節儉甚有法度卒終布衣

伯禧効志

張壽字伯僖涪人也少給縣丞楊放爲佐放爲梁賊

所得壽求之積六年始知其生存乃賣家鹽并得二十萬市馬五匹往贖放道爲羌所劫掠盡凡往三年計道遠不可得數乃單身詣虜涕泣自說虜哀其屢來遣放隨還郡召爲中候詔書除巫尉

以身佩印盡讓所有財物與三弟復為郡掾量平賦役歲出三百五十萬遷功曹吏徙五官掾卒

李餘殘身

李餘涪人父早世兄夷煞人亡命母慎當死餘年十

三問人曰兄弟相代能免母不人曰趣得一人耳餘乃詣吏乞代

母死吏以餘年小不許餘因自死吏以白令令哀傷言郡郡上尚

書天子與以財葬圖畫府廷

舊校云童人李餘涪人可考於先漢士女目篇

寇王二子行勇以仁

寇祺字宰朝梓潼人也與邑子侯蔓俱學

涼州蔓後為渤海王象所殺祺杖劍至象家值象病象謝曰君子

不掩人無備安有為友報讎煞病人也祺乃還久之復往煞象由

是察孝廉為霸陵令濟陰相王晏字叔博涪人也與廣漢張昌寧

叔受業太學昌為河南呂條所煞晏叔煞條事在叔解

李助多方以茲立稱

助字翁君涪人也通各方校醫術作經方

頌說名齊郭玉自此以上

舊校云以下闕文義不可曉不錄按此必言以上為兩漢世人耳舊校誤刪今

無以補之也

章武之興亦迪才倫德賢好古澹心藝文

李仁字德賢涪人也

益部多貴今文而不崇章句仁知其不博乃游學荊州從司馬德操宋仲子受古學以脩文自終也

國輔皓然形動神沈

杜微字國輔涪人也任安弟子先主定蜀

常稱聾闇門不出建興二年丞相亮領州牧選爲主簿輿而致之亮引見與書誘勸欲使以德輔時微固辭疾篤亮表拜諫大夫從其所志

思潛游學休志素林

尹默字思潛涪人也少與李仁俱受學司

馬徽宋忠等博通五經專精左氏春秋自劉歆條例鄭衆賈逵父子陳元方服虔注說略皆誦述希復案本以左傳授後主後主立拜諫議大夫丞相軍祭酒子宗亦爲博士耳

末耳字衍文

欽仲朗博訓詁典墳

李譔字欽仲仁子也少受父業又講問尹

默自五經四部百家諸子伎藝算計卜數醫術弓弩機械之巧皆  
致思焉爲太子中庶子右中郎將著古文周易尚書毛詩三禮左  
氏注解太玄指依則賈馬異於鄭玄與王肅初不相見而意歸多  
同

孫德果銳作劉幹臣

李福字孫德涪人也先主初爲成都令建

興九年遷巴西太守後爲江州都督揚武將軍入爲尚書僕射封  
平陽亭侯延熙初以前監軍司馬福同郡梓潼文恭仲寶亦以才  
幹爲牧亮治中從事丞相參軍

衍衍禕彥玉潤蘭芬劭名表器江漢之俊

總讚十五人也

述梓潼人士

季姜雍穆化播二婦王氏世興實由賢母

季姜梓潼文氏女將

作大匠廣漢王敬伯夫人也少讀詩禮敬伯前夫人有子博女紀  
流二人季姜生康稚芝女始示凡前後八子撫育恩愛親繼若一

堂祖母性嚴子孫雖見官二千石猶杖之婦跪受罰於當衍堂歷五

郡祖母隨之官後以年老不願遠鄉里姜亦常侍養左右紀流出

適分己侍婢給之博好寫書姜手爲作表於是內門相化動行推

讓博妻健爲楊進及博子遵婦蜀郡張叔紀服姑之教皆有賢訓

號之三母堂亡姜救康稚芝婦事楊進如姑舅當中外則之皆成

令德季姜年八十一卒四男棄官行服四女亦從官舍交赴內外

冠冕百有餘人當時榮之王氏遂世興

杜慈專專父不諒只慈涪杜季女巴郡虞顯妻也十八適顯顯

亡無子季欲改嫁與同縣楊上慈曰受命虞氏虞氏早亡妾之不

宰當生事賢姑死就養成室存亡等但欲在終供養亡不有恨願

不易圖季知不可言而奪也乃密謀與強逼迫之慈縊而死

敬楊雪讎壯踰烈士敬楊涪郭孟妻楊文之女也始生失母入

歲父爲舊校盛所殺無宗親依外祖鄭行年十七適孟孟與盛有

舊盛數往來孟家敬楊涕泣謂孟曰盛凶惡薄命為女無男昆惡  
讎未報未嘗一日忘也雖婦人拘制然父子恩深恐卒狂惑益君  
禍患君宜疎之孟以告盛盛不納安漢元年盛至孟家敬楊以大  
杖打殺盛將自殺孟止之與俱逃涪令雙勝出追聞其故而止安  
慰二門會赦得免中平四年涪令向遵為立圖表之

惟茲三媛仁暢義理邦有斯嬪以馳遐紀  
總讚三人

述梓潼列女

右梓潼郡士女讚第六

凡士女十八人十五人士  
三人女

譏曰當衍此  
二字貳州人士自漢及魏二百四十八人而已一百九十七  
人

女後賢二十人合二百六十八人以示來世之君子焉如其遺脫及

後世可書者願貽後雋又春秋穀梁傳首敘曰成帝時議立三傳博

士巴郡胥君安獨駁左傳不祖聖人後漢時魏郡太守王牧薦尹方



爲三公天子詔尙書郎蜀郡張俊策之然不詳其行事

譔曰二州人士自漢及魏可謂衆矣何者世宗多事則相如麟遊伯  
司鳳翔洛下雲翳叔文龍驤在孝宣則王褒蔚炳中和作詠屬文甘  
泉葩爲世鏡在元成則君公蹇蹇心思國病慮經劉危直忤王聽其  
高者則嚴君味道易俗移風仲元端委居爲人宗若夫秉心塞淵與  
物盈沖則楊子雲也名重泰山華夏仰崇則鄭子真也不屈其身志  
高青雲則譙玄也不恥惡君混道推運則楊宣也降及建武明章以  
來出者則能內貫朝揆外播五教贊和鼎味經淪治要上荅太階下  
允民照處者則利居槃桓皓然玄蹈天爵翫之人爵則笑懸車門肆  
夷惠齊紹若斯之倫海內服其英名洙泗方其煥燿矣故曰漢徵八  
士蜀出其四又曰漢具四義蜀選其二可謂不衆乎然巴郡胥君安  
以儒學典雅稱於孝成蜀郡張俊策問尹方不出五經常議犍爲呂  
孟有託孤之節若茲之類郡邑往往垂象刊銘見有苗裔璩晚生長

亂故老以沒莫所咨質不詳其事但依漢書國志陳君所載凡士女二百四十八人而已後賢二十人合二百六十八人以示來世之好事者如能詳其遺脫及有可書願附於左其傳志父祖子孫及有名失事失官位者不列寧州人士亦不列別爲目錄至晉元康末凡三百九十二人也

華陽國志卷第十下

華陽國志卷第十一

後賢志

聞之善志者迷而不作序事者實而不華是以史遷之記詳於秦漢  
班生之書備乎哀平皆以世及事邇可得而言也西州自奉聖晉後  
俊偉倜儻之士或脩德讓行止從時或播功立事當有羽儀上京策  
勳王府甄名史錄侔於先賢會遇喪亂軋搆華夏顛墜典籍多缺族  
祖武平府君愍其若斯乃操簡援翰拾其遺闕然但言三蜀巴漢未  
列又務在舉善不必珍異關之耆舊竹素宜闡今更撰次損益足銘  
後觀者凡二十人綴之斯篇雖行故墜沒大較舉其一隅

衛尉散騎常侍文立廣休

散騎穆穆誠感聖君

西河太守柳隱休然

西河烈烈秉義居貞

漢嘉太守司馬勝之興先

漢嘉克讓謙德之倫

郫令州主簿常昂脩業

郫君騫諤自固底身

江陽太守何隨季業

江陽皎皎命世清淳

梓潼太守王化伯遠

梓潼矜矜在險能平

太子中庶子陳壽承祚

庶子稽古遷固並聲

漢中太守李宓令伯

漢中躡擘才蓋羣生

犍爲太守杜軫超宗

健爲印印友于寔令

給事中任熙伯遠

給事温恭尙德蔑榮

中書郎王長文德備

中書淵識寶道韜明

大長秋壽良文淑

長秋忠肅明允篤誠

大司農西城公何攀惠興

司農運籌思侔良平

少府成都威侯李毅允剛

少府果壯文武是經

衡陽內史楊邠岐之

衡陽固節隱然不傾

尚書三州都費立建熙

尚書準繩古之遺直

湘東太守常騫季慎

湘東汜愛仁以接物

武平太守常寬泰恭

武平臆臆冰清玉嶷

揚烈將軍梓潼內史譙登慎明

闕

江陽太守侯馥世明

闕

文立字廣休巴郡臨江人也少遊蜀太學治毛詩二禮兼通羣書州  
刺史費禕命為從事入為尚書郎復辟禕大將軍東曹掾稍遷尚書  
蜀并於魏梁州建首為別駕從事咸熙元年舉秀才除郎中晉武帝

方欲懷納梁益引致儁彥泰始二年拜立濟陰太守武帝立太子以  
司徒李胤爲太傅齊王驃騎爲少傅選立爲中庶子立上疏曰伏惟

皇太子春秋美茂盛德日新始建

當作建

幼志誕陟大繇猶朝日初暉

良寶耀璞侍從之臣宜簡俊又妙選賢彥使視觀則覩禮容棣棣之  
則聽納當受嘉話駭耳之言靜應道軌動有所采佐清初陽緝熙天  
光其任至重聖王詳擇試非糞朽能可堪任臣聞之人臣之道量力  
受命其所不諧得以誠聞帝報曰古人稱與田蘇遊非舊德乎立上  
故蜀大官及盡忠死事者子孫雖仕郡國或有不才同之齊民爲劇  
又上諸葛亮蔣琬費禕等子孫流徙中畿宜見敘用一則以慰巴蜀  
民之心其次傾東吳士人之望事皆施行十年詔曰太子中庶子立  
忠貞清實有思理器幹前在濟陰政事脩明後事東宮盡輔導之節  
昔光武平隴蜀皆收其才秀所以援濟殊方伸敘幽滯也其以立爲  
散騎常侍累辭不許上疏曰臣子之心願從疏以求昵凡在人情貪

從幽以致明斯實物性賢愚所同臣者何人能無此懷誠自審量邊  
荒遺燼犬馬老甚非左右機納之器臣雖至愚處之何顏詔曰常伯  
之職簡才而授何謙虛也立自內侍獻可替否多所補納甄致二州  
人士銓衡平當爲士彥所宗故蜀尙書犍爲程瓊雅有德望素與立  
至厚武帝聞其名以問立立對曰臣至知其人但年垂八十稟性謙  
退無復當時之望不以上聞耳瓊聞之曰廣休可謂不黨矣故吾善  
夫人也西界獻馬帝問立馬何如對曰乞問太僕帝每善其恭慎遷  
衛尉猶兼都職中朝服其賢雅爲時名卿連上表年老乞求解替還  
桑梓帝不聽咸寧末卒帝緣立有懷舊性乃送葬於蜀使者護喪事  
郡縣脩墳塋當時榮之初安樂思公世子早沒次子宜嗣而思公立  
所愛者立亟諫之不納及愛子立驕暴二州人士皆欲表廢立止之  
曰彼自暴其一門不及百姓當以先公故得爾也後安樂公淫亂無  
道何攀與上庸太守王崇涪陵太守張寅爲書諫責稱當思立言凡



立章奏集爲十篇詩賦論頌亦數十篇同郡毛楚楊崇皆有德美楚  
牂柯崇武陵太守

柳隱字休然蜀郡成都人也少與同郡杜禎柳伸並知名隱直誠篤  
亮交友居厚達於從政數從大將軍姜維征伐臨事設計當敵陷陣  
勇略冠軍爲牙門將巴郡太守騎都尉遷漢中黃金圍督景耀六年  
魏鎮西將軍鍾會伐蜀入漢川圍成多下惟隱堅壁不動會別將攻  
之不能克後主旣降以手令勅隱乃詣會晉文帝聞而義之咸熙元  
年內移河東拜議郎武帝踐祚以爲西河太守在官三年以年老去  
官乞骸還蜀卒於家時年八十長子充連道令次子初舉秀才杜禎  
字文然柳伸字雅厚州牧諸葛亮辟爲從事禎符節令梁益二州都  
督伸度支禎子珍字伯重略陽護軍伸漢嘉巴東太守大同後並舉  
秀才珍子彌字景文伸子純字偉叔有名德幹器舉秀才巴郡宜都  
建平太守西夷長水校尉巴東監軍

司馬勝之字興先廣漢緜竹人也學通毛詩治三禮清尚虛素性澹  
不當榮利初爲郡功曹甚善紀綱之體州辟從事進尚書左選郎徒  
祕書郎時蜀國州書佐望與郡功曹參選而從事侔臺郎特重察舉  
雖位經朝要還爲秀孝亦爲郡端右景耀末郡請察孝廉大同後梁  
州辟別駕從事舉秀才歷廣都新繁令政理尤異以清秀徵爲散騎  
侍郎以宗室禮之終以疾辭去職卽家拜漢嘉太守候迎盈門固讓  
不之官閑居清靜謙卑自牧常言世人不務求道德而汲汲於爵祿  
若吾者可少以爲有餘榮矣訓化鄉閭以恭敬爲先年六十五卒於  
家子尊賢佐皆有令德

常勗字脩業蜀郡江原人也祖父原牂柯永昌太守父高廟令從父  
闕漢中廣漢太守勗少與闕子忌齊各安貧樂道志篤墳典治毛詩  
尚書涉洽羣籍多所通覽州命辟從事入爲光祿郎中主事又爲尚  
書左選郎郡請迎爲功曹時州將董軍政置從事職典刑獄以勗清

亮復爲督軍治訟平當還察孝廉除郫令爲政簡而不煩魏征西將軍鄧艾伐蜀破諸葛瞻於綿竹威振西土諸縣長吏或望風降下或委官奔走勗獨率吏民固城拒守後主檄令乃詣艾故郫穀帛全完刺史袁邵嘉勗志節辟爲主簿勗善儀容翔集動爲表觀言論壯烈州里重之然交友惟賢不交下己者汎愛之恩猶不足邵徵還道卒忌字茂通蜀謁者黃門侍郎喪親以致孝聞察孝廉爲郎使吳稱職舊闕歷參軍什邡二字令大同後刺史邵坐治城被徵忌詣洛陳訴遠國初附君民始結不宜改易又表脩治城池居安思危邊將常職事皆中情晉文帝時爲相國辟忌舍人武帝踐祚拜騎都尉除河內令州名爲難治忌挫折豪勢風教大興縣有奸嫂殺兄者羣黨蔽匿前令莫得忌皆窮治入爲州都方議爲郡守會卒忌爲人信道任數不從下人故爲貴勢所不善是以作詩著論先攻己短臨喪與樂歡哀俱至爲士類所稱忌友人廣漢段宗仲亦有學行蜀時官與忌比袁

邵爲主簿與忌共理郡事文帝善之梁州辟別駕從事舉秀才稍遷官至雲南建寧太守

何隨字季業蜀郡郫人也漢司空武後世有名德徵聘入官隨治韓詩歐陽尚書研精文緯通星曆郡命功曹州辟從事光祿郎中主事除安漢令蜀亡去官時巴土飢荒所在無穀送吏行乏輒取道側民芋隨以絲繫其處使足所取直民視芋見絲相語曰聞何安漢清廉行過從者無糧必能爾耳將絲追還之終不受因爲語曰安漢吏取糧令爲之償察孝廉大同後臺召不詣除河閒王郎中令不就居貧固儉衣弊蔬食晝躬耕耨夕脩講諷鄉族饋及禮厚皆不納目不視色口不語利著譚言十篇論道德仁讓嘗有屠牽猪過隨門猪索斷失之強認溷中猪隨便牽猪與之屠人出門尋得其所失猪謝隨還猪遂以乞之隨家養竹園人盜其筍隨偶行見之恐盜者覺怖走竹中傷其手足挈屐徐步而歸其仁如此太康中卽家拜江陽太守民

思其政年七十一卒官後州鄉人言議平當者皆相謂何江陽至於  
汶山夷有正直廉讓者亦號夷中何江陽杜景文何興仁皆爲作傳  
長子觀字巨忠清公淑慎知名州里察孝廉西都南安令平西長史  
張昌作亂荊州從黨西上郡守無不望風降下至江陽平西將軍羅  
尙表爲安遠護軍討賊平殄除巴郡太守朝議欲以爲寧州刺史會  
病卒次子遊治中從事隨時同郡繁令張崇清廉推讓見稱當時

王化字伯遠廣漢人也漢將作大匠王堂後也祖父商字文表州  
牧劉璋時爲蜀太守有懿德高名在耆舊傳父彭字仲當脫一字巴郡太

守化兄弟四人少有令望化治毛詩三禮春秋公羊傳郡命功曹州  
辟從事光祿郎中主事尙書郎除閬中令爲政清靜察孝廉大同後  
端右郡察孝廉爲樂涇令縣近邊塞值胡虜反化率吏民積穀堅守  
虜斷道重圍孤絕七年伺虜怠惰出軍討之民得野掠大軍至虜退  
以功封關內侯遷朱提太守撫和殊俗得夷晉心轉任梓潼復有稱

績爲人嚴重言論方雅臧否允衷州里服其誠亮年七十二卒官弟振字仲遠亦有德望廣都令巴東太守叔弟岱字季遠恪居官次歷廣陽作唐令早亡少弟崇字幼遠學業淵博雅性洪粹蜀時東觀郎大同後梁州辟別駕別舉秀才尙書郎與壽良李宓陳壽李驤杜烈同入京洛爲二州標儁五子情好未必能終惟崇獨以寬和無所彼此著蜀書及詩賦之屬數十篇其書與陳壽頗不同官至上庸蜀郡太守

陳壽字承祚巴西安漢人也少受學於散騎常侍譙周治尙書三傳銳精史漢聰警敏識屬文富豔初應州命衛將軍主簿東觀祕書郎散騎黃門侍郎大同後察孝廉爲本郡中正益部自建武後蜀郡鄭伯邑太尉趙彥信及漢中陳申伯祝元靈廣漢王文表皆以博學洽聞作巴蜀耆舊傳壽以爲不足經遠乃并巴漢撰爲益部耆舊傳十篇散騎常侍文立表呈其傳武帝善之再爲著作郎吳平後壽乃鳩

合三國史著魏吳蜀三書六十五篇號三國志又著古國志五十篇  
品藻典雅中書監荀勗令張華深愛之以班固史遷不足方也出爲  
平陽侯相華又表令次定諸葛亮故事集爲二十四篇時壽良亦集  
故頗不同復入爲著作鎮南將軍杜預表爲散騎侍郎詔曰昨適用  
蜀人壽良具員且可以爲侍御史上官司論七篇依據典故議所因  
革又上釋諱廣國論華表令兼中書郎而壽魏志有失勗意勗不欲  
其處內表爲長廣太守繼母遺令不附葬以是見譏數歲除太子中  
庶子太子傳從後

按傳從當作轉徙謂愍懷太子被廢  
一徙金墉城再徙許也專具晉書

再兼散騎常

侍惠帝謂司空張華曰壽才宜真不足久兼也華表欲登九卿會受  
誅忠賢排擯壽遂卒洛下位望不充其才當時冤之兄子符字長信  
亦有文才繼壽著作佐郎上廉令符弟苳字叔度梁州別駕驃騎將  
軍齊王辟掾卒洛下苳從弟階字達之州主簿察孝廉襄中令永昌  
西部都尉建寧興古太守階辭章粲麗馳名當世凡壽所述作二百

餘篇符莅階各數十篇二州先達及華夏文士多為作傳大較如此  
時梓潼李驤叔龍亦雋逸器知名當世舉秀才尚書郎拜建平太守  
以疾辭不就意在州里除廣漢太守初與壽齊望又相昵友后與壽  
情好攜隙還相誣攻有識以是短之亦自列傳

李宓裴松之三國志注引作密下同字令伯犍為武陽人也祖父光朱提太守父早

亡母何更行見養祖母治春秋左傳博覽五經多所通涉機警辨捷

辭義響起事祖母以孝聞其侍疾則泣涕側息日夜不解帶膳飲湯

藥必此下舊衍過字今自口嘗舊作目嘗口今據三國志注引刪本郡禮命不應州

辟從事尚書郎大將軍主簿太子洗馬奉使聘吳吳主問蜀馬多少

對曰官用有餘民閒自足吳主與羣臣汎論道義謂寧為人弟宓曰

願為人兄吳主曰何以為兄宓曰為兄供養之日長吳主以上十六字舊脫三

國志注引有今據補及羣臣稱之大同後征西將軍鄧艾聞其名請為主簿及

書招欲與相見皆不往以祖母年老心在色養拒州郡之命獨講學



立旌授生武帝立太子徵爲洗馬詔書累下郡縣此下舊行相字今

逼遣此字舊脫三國志注引有今據補宓上疏疏在本傳三國志注引無此七字作

夙遭閔凶生孩六月慈父見背行年四歲舅奪母志祖母劉愍臣孤

弱躬見撫養臣少多疾病九歲不行零丁孤苦至於成立既無伯叔

終鮮兄弟門衰祚薄晚有兒息外無期功強近之親內無應門五尺

之童煢煢孑立形影相弔而劉早嬰疾病常在牀蓐臣侍湯藥未曾

廢離逮奉聖朝沐浴清化前太守臣達察臣孝廉後刺史臣榮舉臣

秀才臣以供養無主辭不赴命詔書特下拜臣郎中尋蒙國恩除臣

洗馬猥以微賤當侍東宮非臣隕首所能上報臣具表聞辭不就職

詔書切峻責臣逋慢郡縣逼迫催臣上道州司臨門急於星火臣欲

奉詔奔馳則劉病日篤苟順私情則告訴不許臣之進退實爲狼狽

伏惟聖朝以孝治天下凡在故老猶蒙矜愍況臣孤苦特爲尤甚且

臣少仕僞朝歷職郎署本圖宦達不矜名節今臣亡國賤俘至微至

此下舊行相字今

三國志注引無此七字作

於是宓上書曰臣以險

難

孤苦至於成立既無伯叔

之童煢煢孑立形影相弔而劉早嬰疾病常在牀蓐臣侍湯藥未曾

廢離逮奉聖朝沐浴清化前太守臣達察臣孝廉後刺史臣榮舉臣

秀才臣以供養無主辭不赴命詔書特下拜臣郎中尋蒙國恩除臣

洗馬猥以微賤當侍東宮非臣隕首所能上報臣具表聞辭不就職

詔書切峻責臣逋慢郡縣逼迫催臣上道州司臨門急於星火臣欲

奉詔奔馳則劉病日篤苟順私情則告訴不許臣之進退實爲狼狽

伏惟聖朝以孝治天下凡在故老猶蒙矜愍況臣孤苦特爲尤甚且

臣少仕僞朝歷職郎署本圖宦達不矜名節今臣亡國賤俘至微至

奄奄人命危淺朝不慮夕臣無祖母無以至今日祖母無臣亦無以

終餘年母孫二人更相爲命是以區區不敢廢遠臣今年四十有四

祖母劉今年九十有六是臣盡節於陛下之日長報養劉之日短也

烏鳥私情願乞終養臣之辛苦非徒蜀之人士及二州牧伯所見明

知皇天后土實所共鑒願陛下矜愍愚誠聽臣微言庶劉氏

倖保卒餘年臣生當隕首死當結草臣不勝犬馬怖懼之情武帝覽

之曰宓不空有名也嘉其誠款賜奴婢二人下郡縣供其祖母奉膳

及祖母卒服終

徙尚書郎爲

注引有今據補

注引有今據補

注引有今據補

注引有今據補

河內温令敷德陳教政化嚴明大傅鉅平侯羊公薨無子帝令宗子為世子嗣之不時赴喪宓遣戶曹齎移推轂遣之中山諸王每過温

縣必責求供給吏民患之宓至中山王過縣徵芻芟薪蒸宓牋此字舊脫

三國志注引引高祖過沛賓禮此字舊脫三國志注引有今據補老幼桑梓之供一

無煩費伏惟明王孝思惟則動識先戒本國望風式歌且舞誅求煩

碎所未聞命後諸王過不敢煩温縣盜賊發河內餘縣不敢近温追

賊者不敢經界隴西王司馬子舒深敬友之而貴勢之此二字舊脫三國志注引

有今據補家憚其公直宓去官為州大中正性方亮不曲意勢位者失荀

張指左遷漢中太守諸王多以為冤一年去官年六十四卒著述理

論論中和仁義儒學道化之事凡十篇安東將軍胡巖與皇甫士安

深善之又與士安論夷齊及司馬文中杜超宗郗令先文廣休等議

論往返言經訓詁衆人服其理趣釋河內趙子聲譏詩賦之屬二十

餘篇壽良李驤與陳承祚相長短宓公議其得失而切責之常言吾

獨立於世顧景爲疇而不懼者心無彼此於人故也宓六子皆英挺秀逸號曰六龍長子賜字宗碩州別駕舉秀才汶山太守少與東海王司馬元超友昵每書詩往返雅有新聲少子興字雋碩太傅參軍幼子盛此下當脫一字目錄不載今無以補之碩寧浦太守宓同時蜀郡高玩字伯珍少受學於太常杜瓊術藝微妙博聞強識清尚簡素少與宓齊名官位相比大同後察孝廉除曲陽令單車之縣移檄縣綱紀不使遣迎以明三才徵爲太史令送者亦不出界朝廷稱之方論大用會卒

杜軫字超宗蜀郡成都人也父雄字伯休安漢雒令軫少師譙周發明高經於譙氏之門郡命爲功曹鄧艾旣破蜀被徵鍾會進成都時太守南陽張府君不肯出官軫進曰征西囚執鎮西在近必有所遣軍亂之際交害無常宜避正殿府君卽出住下舍會果遣參軍牽弘爲太守數百騎擐甲馳馬入郡前驅問侯所在云已出善之弘復召爲功曹察孝廉除建寧令徙任山陽新城池陽所在有治入爲尚書

郎每升降趨翔廊閣之下威容可觀中朝偉之遷健爲太守惠愛在民還爲州大中正軫旣才學兼該而氣量倜儻武帝雅識之方用內侍會卒時年五十八弟烈字仲武貞幹敏識平坦和粹名譽侔軫察孝廉歷平康牛鞞南鄭安陽令王國建首選爲郎中令遷衡陽太守兄軫喪自上求去官以兄子幼弱軫喪飄颻欲扶將靈柩葬舊墳武帝歎惜軫能用未盡而嘉烈弟意轉拜徙官健爲太守又轉湘東少弟良字幼倫亦有當世局分舉秀才茶陵新都令國王當作王國誤郎中令遷涪陵建寧太守兄弟並典州里以爲美譚軫二子長子毗字長基少子秀字彥穎珪璋琬琰世號二鳳毗舉秀才大將軍辟掾太傅參軍平東長史尙書郎稍遷鎮南軍司益州刺史主簿早卒按早卒二字疑

衍晉書載毗爲杜陵所害也

任熙字伯遠蜀郡成都人也漢大司農任方後也世有德彥父元字秀明健爲太守執金吾熙治毛詩京易博通五經事親至孝居喪毀

瘠爲州鄉所稱察孝廉除南鄭令以病去官復授南鄭不就轉梓潼令爲政清淨辭疾告歸勤農力穡居室致給循訓閨門內則可法博愛以謙恭接物開門待賓傾懷下士客無長幼必有供膳清談遊講不妄失言祇慎著聞太康中除越巂護軍非其雅好不往徵給事中熙以侍臣日月左右贊暉揚光不可苟私終以病辭而蜀郡令每至官爲之脩謁歲致羊酒卽家拜朱提太守固讓不之官好述作詩誄論難皆粲豔年六十九卒於家子蕃字憲祖察孝廉新都令西夷司馬涪陵太守蕃子迪字叔孤少與巴西龔壯俱知名而學業優之早歿熙同時犍爲楊彭敬宗弟達訓宗各以德行稱同察孝廉彭比蘇令甘露降其縣達滇池令殊俗懷其德

王長文字德儁廣漢郪人也父顥字伯元犍爲太守長文天姿聰警高暢敏識治五經博綜羣籍弱冠州三辟書佐丁時興衰託疾歸家大同後郡功曹察孝廉不就遂陽愚嘗絳衣絳帽牽猪過市中訖人

與語僞不聞常騎牛周旋郡守初至詣門脩敬至閭走出請終不還  
刺史淮南胡罷辟從事祭酒臥在治罷出板舉秀才長文陽發狂疾  
步擔走出門罷累遣教請還終不顧還家養母獨講學著無名子十  
三篇依則論語又著通經四篇亦有卦名擬易玄以爲春秋三傳傳  
經不同每生訟議乃據經摭傳著春秋三傳十二篇又撰約禮已當作  
以讀下屬除煩舉要凡十篇皆行於時長文才鑒清妙汎愛廣納放蕩闊  
達不以細宜廉介爲意亦不好臧否人物故時人愛而敬之以母欲  
祿養咸寧中領蜀郡太守郫有孝子羅偶事親至孝二親將亡時病  
不能食肉終身不食肉郡察孝廉長文追爲立表以旌之宰府辟二  
司及撫軍大將軍王濬累辟不詣濬薨以故州將軍弔祭元康初試  
守江原令縣收得盜賊長文引見誘慰時適臘晦皆遣歸家獄先有  
繫囚亦遣之謂曰教化不厚使汝等如此長吏之過也蜡節慶祈歸  
就汝上下善相懽樂過節來還當爲思他理羣吏惶遽爭請不許尋

有赦令無不感恩所宥人輟不爲惡曰不敢負王君將喪去官民思其政大將軍梁王彤及諸府並辟長文曰吾從其先命者遂應彤招爲從事中書郎諸王公卿慕其名咸與之交賈氏之誅從彤有功封關內侯再爲中書郎愍懷太子死於許下博士中書論虞祔之禮長文議虞祭宜還東宮以繼太子者爲主配食於潁川府君皆施行除洛陽令長文見彤曰主者不庶幾奏長文爲洛陽令彤笑答曰卿乃不庶幾非主者也固辭不拜聞益州亂以通經筮得老蠶緣枯桑之卦歎曰桑無葉蠶以卒也吾蜀人殄於是矣拜蜀郡太守暴疾卒時年六十四長文時人蜀郡柳竺任興亦博學著聞俱爲州別駕竺在右職公亮蹇蹇刺史盛怒欲殺人羣下請不聽竺乃懷縛徑入頓几上乃極陳其刑理刺史從謝還縛舊校云闕皆早亡舊校云一作長久按晉書長文有傳不得

作久舊校甚非

壽良字文淑蜀郡成都人也父祖二世犍爲太守良少與犍爲張徵

費緝並知名治春秋三傳貫通五經澡身貞素州從事散騎黃門侍郎大同郡主簿上計吏察孝不就州辟主簿治中別駕舉才行刺史皇甫晏貢之三司遂辟太宰除霸城令始平太守治政著稱從扶風轉秦國內史文立卒後温令李宓表武帝言二州人士零頽才彥凌遲無復厠豫綱紀後進慰寧遐外者良公朝在時二州之望宜見超

子當作升

紹繼立後帝徵爲黃門侍郎兼二州都給事中梁州刺史遷

散騎常侍大長秋卒葬洛北芒山徵字建興張翼子也篤志好學官至廣漢太守緝字文平清檢有治幹舉秀才歷城令涪陵太守遷譙

內史

舊校云良公朝疑誤

何攀字惠興蜀郡郫人漢司空沘鄉侯武弟潁川太守顯後也父包

字休楊察舉秀孝皆不行除瑯琊王中尉不就攀兄弟五人皆知名

攀少夙成奇姿卓逸弱冠郡主簿上計吏州辟從事刺史皇甫晏稱

攀王佐才也以爲主簿泰始十年養母歸家晏爲牙門張弘等所害



攀操喪徑詣洛訟釋事得清刺史王濬復辟主簿別駕咸寧三年濬  
被詔罷屯田兵作船爲伐吳調攀進曰今見佃兵但六百人計作船  
六七年財可勝萬人後者未成前者已腐無以輔成國意宜輒召回  
守休兵及諸武吏并萬餘人造作歲終可辨濬及綱紀疑輒召萬兵  
欲先上須報攀曰官家雖欲伐吳疑者尙多卒聞召萬兵必不見聽  
以佃兵作船船不時成當輒召以速爲機設當見却功夫已成勢不  
得止濬善之議欲入山裁船動數百里艱難攀曰今冢墓多種松柏  
當什四市取以速爲機濬悅之任攀典舟船器械冬遣攀使洛攀曰  
聖人之功可成使人信之不可必也夫高祖之大略猶未察於韓信  
婁敬因蕭何子房而後用之今建非常之功或莫之信羊公使君同  
盟國家所重加曩日失策江陵按江當作西謂祜救西陵督步闡  
爲陸抗所敗也事具三國志晉書思  
有夙駕宜與相聞此一助也濬曰何但羊叔子亦宗元亮之憂君至  
洛官家未有舉意便前至襄陽與羊宗論之攀既至洛拜表獻策因

至荊州與刺史宗廷論宗未許乃見羊祜累日共畫用兵之要攀曰

若令循清海

按令循清海當作青徐循海

以趣京下壽春楊州直指秣陵兗豫踰

海

按海當作淮

並據桑浦則武昌以東會稽以西必然駭困荊州平南徑

造夏口巴東諸軍固守西陵益梁之衆浮江東下封樂鄉要巴丘則  
武陵零桂長沙湘東從風而靡矣但明信賞首尾俱會旌旗耀天四  
面雲合乘勝席卷傳檄南極吳會不盡平者未之有也羊祜大悅遂  
表請伐吳尋徵濬大司農至晉壽詔以濬爲龍驤將軍除攀郎中參  
濬軍事攀頻奉使詣洛時未婚司空裴公奇其才以女妻之五年秋  
攀使在洛安東將軍王渾表孫皓欲北上邊戍警戒朝議征却須六  
年攀上疏策皓必不敢出宜因今戒嚴掩取甚易中書令張華命宿  
下舍設諸難攀皆通之又濬性在忠烈受命必果宜重其位號詔書  
遷濬平東將軍督二州事吳平封關內侯濬入拜輔國攀爲司馬上  
論時務五篇除滎陽令進廷尉平有盜開城門下關者法據大辟攀

駁之曰上關執信之主下關儲備之物設有開上關何以加刑遂減死多所議讞遷散騎侍郎太傅楊駿謀逆請衆官攀與侍中傅祗侍郎王愷等往惠帝從楚王瑋殿中中郎孟觀策戒嚴誅駿駿外已忽攀與祗踰牆得出侍天子天子以爲却軍校尉領熊渠兵一戰斬駿社稷用安封西城公邑萬戶策曰於戲在昔先王光濟厥世罔不開國列土建德表功也故逆臣楊駿謀危社稷構兵飛矢集於殿庭白刃交於宮闈攀受命奮討凶逆速殄忠烈果毅朕甚嘉焉今以魏興之西城爲攀封國錫茲玄社苴以白茅永爲晉藩輔往欽哉敬乃有土惠康黎元無或以隳爾顯烈又賞絹萬匹攀固辭受五千疋又錫拜弟逢平鄉侯兄子夔關內侯遷宣舊校云關內史不就轉東羌校尉西虜寇邊遣長史楊威討之違攀指授失利徵還領越騎校尉武庫災百官皆救火攀獨以兵衛宮復賞絹五百匹領河南尹遷揚州刺史假節在職數年德教敷宣征虜將軍石崇表東南有兵氣不宜用

遠人徵拜大司農兼三州都自表以被疾錯忘不堪銓量人物讓都  
職於任熙費緝不聽遷兗州刺史錫寶劍赤舄固辭不之官時帝室  
政衰多害忠直又諸王迭起好結黨徒攀闔門治疾不與世務朝議  
欲以爲公會薨時年五十七天子愍悼追贈司農印綬諡曰桓公遺  
令勅世子務行恭儉引荀公會諸葛德林爲模範子璋嗣

李毅字允剛廣漢郾人也祖父朝字偉南州別駕從事父曰字欽宗  
光祿郎中主事毅少散達不治素檢年二十餘乃詣郡文學受業通  
詩禮訓詁爲學主事太守弘農王濬臨學講試問祭酒姬豔曰學中  
有可成進幾百人豔對曰可有百人濬怒言童冠八百而成者百人  
教少何爲毅對曰如豔之言明府之教盛於孔氏不爲少也濬奇之  
命爲主簿濬嘗夢得三口刀云人以禾益之手持不得以問郡丞與  
掾吏莫能知毅對曰吉祥也三刀者州字而益之禾持不得禾傍失  
者秩字明府秩當至益州濬笑曰如卿言當相以爲秀才張弘殺益

州刺史皇甫晏誣表晏反毅白濬曰皇甫侯起自諸生位極方州又當何求且廣漢與成都密邇而統梁州者衿益州之領須防若今日也益州有禍乃此郡之憂加張弘小豎衆所不與宜時赴討濬欲先上後行毅曰大夫出疆苟利社稷專之爲賢何況殺主賊急當不拘常宜濬從之發兵與牙門滿泰等共討弘斬之詔書遷濬益州刺史復爲州主簿別駕舉秀才及濬伐吳與何攀並爲參軍吳平封關內侯除隴西護軍以疾去官徙繁令遷雲南太守濬臨薨上表後武帝思濬問毅所在徙犍爲使持節南夷校尉久之犍爲民毛詵李叡與朱提民李猛共逐太守杜俊雍約以叛衆數萬毅討破之斬詵猛首叡走依五茶當作夷當重有夷字亦叛晉朝復置寧州以毅爲刺史加龍驤將軍封成都縣侯夷遂大反破沒郡縣攻圍州城中原亂而李雄寇蜀救援不至疾病薨於窮城懷帝嘉其忠節追贈少府諡曰威侯毅性通博居情雅厚賑卹寒貧篤於故舊人咸愛歸之但好談調德

重猶少從弟苾字叔平脩身砥礪各行數諫毅宜矜嚴毅笑應之曰  
吾小來不治名素終杖旄節故可至九卿卿清儉當作檢履道卒不失

成都令也時毅始受南夷而苾爲歷城令果作成都遷犍爲太守位  
官不及毅毅子釗世秉儒學有格望以父任爲謁者除壽林侯相不  
就爲尙書外兵郎自表赴難至梓柯夷斷道不得進經年以寧州城  
中無穀父疾病未知吉凶不食穀惟茹草迄至奔喪至朱提越嶲太  
守西夷校尉毅女秀適漢嘉太守新都王載有才智父亡後州文武  
推領州三年二州當太清中位至方州節將者壽良何攀及毅永嘉  
中巴張弈希祖爲荊州刺史南蠻長水校尉蜀郡張峻紹茂爲監南  
中八部事西夷校尉持節事

楊邠字岐之犍爲武陽人也少好學志古藻勵各行州辟主簿別駕  
刺史王濬舉秀才安漢雒令國王中尉以選爲尙書郎遷汶山太守  
值夷復讎失殊俗和徙授巴東轉廣漢永嘉初進衡陽內史遇流民

叛亂攻沒長沙湘東邠輒救助賊衆浸盛遂破郡城獲邠欲以爲主  
邠不許賊晝夜持守邠候其小怠夜急走比覺已去遠收餘衆軍重  
安欲投湘州刺史荀眺共圖進取會眺降賊邠孤軍固城賊圍之誓  
死不移遂卒城中時年六十九帝爲鎮東大將軍嘉其忠節死義遣  
使弔贈策曰惟永嘉七年四月己未使持節都督江陽諸軍事鎮東  
大將軍瑯琊王睿謹遣板命前衡陽內史楊君忠肅貞固守正不移  
雖危逼節義可嘉不幸殞卒孤城甚悼之今列上尙書贈君淮南內  
史魂而有靈嘉茲寵榮嗚呼哀哉邠同郡楊稷文曹泰始初爲交阯  
太守平九真鬱林日南四郡斬吳交州刺史劉悛大將軍脩則武帝  
方授交州會孫皓遣大將薛珣陶璜十萬人攻稷被攻八月救援不  
至衆寡不敵遂爲璜所獲囚稷欲以送皓稷毆血死帝嘉其忠烈  
歿命贈交州刺史也

費立字建熙犍爲南安人也父揖字君讓巴西太守立學義冲邃玄

靜沈嘿察孝廉王國中尉王年少好輕行遊觀立常正色匡諫及上  
疏風喻辭義劇切合箴規之體出爲成都令縣名難治立莅之垂績  
以性公亮入爲州大中正除巴西太守不就轉梁益寧三州都督兼  
尚書值大駕西幸長安常與大臣居守在洛加員外散騎常侍封關  
內侯每準正三州人物品格褒貶帥意方規無復疏親莫不畏敬然  
委曲者多恨其繩墨數辭諸郡意在河泰汝潁久之朝議欲以爲荆  
州永嘉六年與子并沒於胡寇立時漢國呂淑字偉德以清彥辟別  
舉秀才尚書郎秦國內史長水校尉員外常侍梁州都督與立同沒  
胡寇

常騫字季慎蜀郡江原人也祖父竺字代文南廣太守侍中父偉字  
公然閬中令騫治毛詩三禮以清尚知名州辟部從事主簿郡請功  
曹察孝廉萍鄉令以選爲國王侍郎出爲緜竹令國王歸之復入爲  
郎中令從王起義有功封關內侯遷魏郡太守加材官將軍以晉政



衰覩中原不靜固辭去官拜新都內史時蜀亂民皆流在荆湘徙湘東太守疾病未拜卒年六十八騫性汎愛敦敬當友宗族當官脩理恕以撫物好咨問動必謙讓州鄉以爲儀範二州清官見述者先有宜都太守健爲唐定義業隴西太守巴西馮山休翊而後騫云

常寬字泰恭騫族弟郢令曷弟子也父廓字敬業以明經著稱早亡闔門廣學治毛詩三禮春秋尙書尤耽意大易博涉史漢彊識多聞而謙虛清素與俗殊務郡命功曹及察孝廉不就州辟主簿別駕舉刺史羅尙秀才爲侍御史除繁令隨民縣零陵以舉將喪去官湘州叛亂乃南入交州及州刺史陶咸表爲長史固辭不之職雖流離交城衣敝襁袍冠皮冠乘牛往來獨鳩合經籍研精著述依孟陽宗盧師矩著典言五篇撰蜀後志及後賢傳續陳壽耆舊作梁益篇元帝踐祚嘉其德行潔白拜武平太守民悅其政以榮貴非志在官三年去職尋梁頌作亂得免難卒於交州凡所著述詩賦論議二十餘篇

子長生字彭祖亦有學行州主簿資中令治中從事早亡時蜀郡太守巴西黃容亦好述作著家訓梁州巴紀姓族左傳抄凡數十篇漢嘉太守蜀郡杜龔敬脩亦著蜀後志及志趙廐李特叛亂之事及喪紀禮式後生有取焉

譙登字慎明巴西西充國人譙周孫也仲父熙察孝廉本部大中正沔陽令叔父同字彥紹少知名拒州郡之命梁州刺史壽良與東羌校尉何攀貢之三司及大將軍幕府爲尙書郎除錫令亦有爲作傳者登少以公亮義烈聞郡命功曹州辟主簿別駕從事領陰平太守郡五官素大姓豪擅侵凌羌晉登誅之郡中皆肅後以李特作亂本郡沒寇父爲李雄巴西太守馬脫所殺乃東詣鎮南劉公請兵時中原亂守公三年不能得兵表拜揚烈將軍梓潼內史使合義募登凡募巴蜀流士得二千人鎮西羅尙以退住巴郡登從尙索益軍討雄不得乃往攻宕渠斬脫食其肝巴西賊破復詣尙求軍尙參佐多以

必無利登憤恚數凌折之又加責於尙尙但下之而已會羅蒙殺雄  
太尉李離舉梓潼來降登徑進涪城雄自攻登爲登所破而尙將張  
羅進屯犍爲之合水文碩殺雄太宰李國以巴西降羅遣軍掠廣漢  
破雄叔父驤虜其妻子募人斫雄頭賊以向困而尙本參佐恨登之  
見矜侮不供其軍食益州刺史皮素至巴東勅平西送故遣將張順  
楊顯救登至墊江素遇害順顯還雄知登乏食遣驤致攻兵窮士餓  
誓死不退衆亦餓死而無去者永嘉三年爲驤所生得輿登致雄言  
辭慷慨涕泣獻款無服降臣折情雄乃殺之囚其軍士皆以爲奴虜  
男兵士而連陰雨百餘日雄中以登爲枉而所領無辜怒氣感天下  
赦出登軍士湮沒者初尙之在成都也與雄攻戰郫令犍爲張昕欽  
明每摧破雄雄衆憚之而救助不能并心爲雄所殺雄常言羅尙將  
均如張昕輩吾族早無遺矣時牙門左汜亦有戰功尙不能益其兵  
穀汜恚恨以母喪歸尙累召不往尙怒曰微左汜當不滅賊乎遂殺

之雄聞汜死大小相賀登同郡縣李高亦有武幹平吳時與牙門將處前獲孫皓封縣侯官至金城鴈門太守

侯馥字世明江陽人也察孝廉平西參軍舊空四字校云闕薨後按薨上當有李毅二

字巴郡亂辟地入犍柯寧州刺史王遜領平西將軍復取為參軍遜

議欲遷犍柯太守謝恕為涪陵太守出屯巴郡之把口表馥為江陽

太守往江陽之泚源撫卹蠻獠克復江陵請當作清通長江雄征東大

將軍李恭已在江陽馥招降夷獠脩繕舟艦為進取調預白遜請軍

移恕俱出涪陵不能自前恭舉眾攻馥眾寡不敵為恭所破獲生虜

馥送雄雄下廷尉責當有脫曰事君有死無貳其次破家與國今縱不

死又無益國灰沒其分守心而已無他願望雄必欲屈之使馥同郡

人張迎曉之馥怒罵迎曰吾等國亡不能存大難不能死低眉海內

何面目相見也且王寧州治亂才也以吾有桑梓之取故遠上尚書

遣吾討賊受命之日實忘寢食但裁船未辦請軍未至牽揣不及為

他所先當滅身隕碎以謝不及冀上不負日月下不愧王侯吾豈苟  
生如卿兒女之人乎迎還白雄雄義而赦之時雄衆寇所獲犍爲太  
守建寧魏紀漢國太守梓潼文琰巴郡太守巴西黃龕涪陵太守巴  
西趙弼永昌謝俊梓柯文猛皆區區稽顙無如馥者數年卒

譏曰文王多士才不同用孔門七十科

舊闕  
二字

揆百行殊塗貴於一致

若斯諸子或挺珪璋之質或苞瑚璉之器或耽儒墨之業或韜王佐  
之略潛則泥蟠躍則龍飛揮翮揚芳流光遐紀實西土之珍彥聖晉  
之多士也徒以生處限外服膺日淺負荷榮顯未充其能假使植幹  
華宇振條神區德行自有長短然三趙兩李張何之軌其有及之者  
乎譙登侯馥忠規奮烈美志不遂哀哉

五公

司空何武

司空趙戒

太尉趙謙

司徒趙溫

司空張皓

華陽國志卷第十一

華陽國志卷第十二

序志

常璩道將

巴蜀厥初開國載在書籍或因文緯或見史記久遠隱沒實多疎略及周之世侯伯擅威雖與牧野之師希同盟要之會而秦資其富用兼天下漢祖階之奄有四海

按當有脫文

梁益及晉分益爲寧司馬相如

嚴君平楊子雲陽成子玄鄭伯邑尹彭城譙常侍任給事等各集傳記以作本紀略舉其隅其次聖稱賢仁人志士言爲世範行爲表則者各注史錄而陳君承祚別爲耆舊始漢及魏煥乎可觀然三州土地不復悉載地里志頗言山水歷代轉久郡縣分建地名改易於以居然辨物知方猶未詳備於時漢晉方隆官司星列提封圖簿歲集司空故人君學士蔭高堂翳帷幕足綜物土不必待本紀矣曩遭阨運函夏潛堙李氏據蜀兵連戰結三州傾墜生民殲盡府庭化爲狐狸之窟城郭蔚爲熊羆之宿宅遊雉鹿田棲虎豹平原鮮麥黍之苗

千里蔑雞狗之響丘城蕪邑莫有名者嗟乎三州近爲荒裔桑梓之  
域曠爲長野反側惟之心若焚灼懼益遐棄城隍靡聞迺考諸舊紀  
先宿所傳并南裔志驗以漢書取其近是及自所聞以著斯篇又略  
言公孫述蜀書咸熙以來喪亂之事約取耆舊士女英彥又肇自開  
闢終乎永和三年凡十篇號曰華陽國記夫書契有五善達道義章  
法戒通古今表功勳而後旌賢能恨瓌才短少無遠及不早援翰執  
素廣訪博咨流離困瘵方資腐帛於顛牆之下求餘光於灰塵之中  
剿滅者多故雖有所闕猶愈於遺忘焉蜀紀言三皇乘祗車出谷口  
秦宓曰今之斜谷也及武王伐紂蜀亦從行史記周貞王之十六年  
秦厲公城南鄭此谷道之通久矣而說者以爲蜀王因石牛始通不  
然也本紀旣以炳明而世俗閒橫有爲蜀傳者言蜀王蠶叢之間周  
迴三千歲又云荆人鼈靈死屍化西上後爲蜀帝周萇弘之血變成  
碧珠杜宇之魄化爲子鵑又言蜀椎髻左衽未知書文翁始知書學



案蜀紀帝居房心決事參伐參伐則蜀分野言蜀在帝議政之方帝  
不議政則王氣流於西故周失紀綱而蜀先王七國皆王蜀又稱帝  
此則蠶叢自王杜宇自帝皆周之叔世安得三千歲且太素資始有  
生必死死終物也自古以來未聞死者能更生當世或遇有之則爲  
怪異子所不言況能爲帝王乎碧珠出不一處地之相距動數千里  
一人之血豈能致此子鵲鳥今云是舊或曰舊周

舊校云今按說文云蜀王望帝姬其

相妻慚亡去爲子舊鳥故蜀人聞子舊皆起云望帝舊戶圭切所言與蜀志所述相似爾雅亦云舊周子舊鳥也出蜀中四海有

之何必在蜀昔唐帝萬國時雍虞舜光宅八表大禹功濟九州后稷

封殖天下井田之制庠序之教由來遠矣孔子述而不作信而好古

竊比於我老彭則彭祖本生蜀爲殷太史夫人爲國史作爲聖則僊

自前世見稱在昔及周之末服事於秦首爲郡縣雖濱戎夷亦有冠

冕故蜀紀曰大人之鄉方大之國也至於漢興反當荒服而無書學

乎漢書曰郡國之有文學因文翁始若然翁以前齊魯當無文學哉

漢末時漢中祝元靈性滑稽用州牧劉焉談調之末與蜀士燕胥聊著翰墨當時以爲極歡後人有以爲惑恐此之類必起於元靈之由也惟智者辨其不然幸也綜其理數或以爲西土險固襟帶易守世亂先違道治後服若吳楚然固逋逃必萃奸雄覬覦蓋帝王者統天理物必居土中德膺命運非可資能恃險以干常亂紀雖饕竊名號終於絕宗殄祀何者天命不可以詐詭而邀神器不可以僥倖而取也是以四岳三塗陽城太室九州之險而不一姓冀之北土馬之所產古無興國夫恃險憑危不階曆數而能傳國垂世所未有也故公孫劉氏以敗於前而諸李踵之覆亡於後天人之際存亡之術可以爲永鑒也干運犯曆破家喪國可以爲京觀也今齊之國志貫之一揆同見不臣所以防狂狡杜奸萌以崇春秋敗當作絕之道也而顯賢能著治亂亦以爲獎勸也其序曰

先王經略萬國剖分厥甸巴梁式象縣辰九牧述職貢賦以均佐周

斃紂相漢亡秦實繁其民世載其俊

述巴志第一

維天有漢鑒亦有光實司羣望表我華陽炎劉是應洪祚攸長

按此下當

有脫文

述漢中志第二

井絡啓耀文昌契符芒芒禹蹟畫爲九州功冒普天率土以休光靈  
遐照慶祚爽流邦家濟濟世德球球

述蜀志第三

蠢爾南域在彼要荒漢武德振蠻貊是攘開州列郡幽裔來王柔遠  
能邇實須才良甄德表失以明紀綱

述南中志第四

赤德中微巨猾干篡白虜乘釁致民塗炭爰迄靈獻皇極不建牧后  
失圖英雄迭進覆車齊軌蒙此艱難

述公孫劉二牧志第五

政去王室權流三傑瓜分天壤宰割民物舍彼信順任此智計大道  
既隱詭詐競設並以豪特力爭當世居正慮明名號絕替身兼萬乘  
籍同列國

述劉先主志第六

乾坤混始樹君立王天工人代萬邦是望明不二日地不重王苟非  
其器窮高必亢濛濛後主弗慮弗臧負乘致寇世業以喪

述劉後主志第七

陽升三九品物始亨帝紘失振任非其良趙倡禍階亂是用長羅州  
播蕩朱旌莫亢皮張不造戎醜攸行哀哀黎元顧瞻靡望

述大同志第八

素精南飄天維弛綱薨薨特流肆其豺狼蕩雄纂承殲我益梁牧守  
顛摧黔首卒嘗三州毀曠悠然以荒絡結王網民亦流亡

述李特雄期壽勢志第九

華嶽降精江漢吐靈濟濟多士命世克生德爲世備幹爲時貞略舉  
士女表諸賢明世濟其美不隕其名

述先賢士女總讚論第十

皇皇大晉下土是覆化贍教洽誕茲彥茂峨峨俊乂亶亶英秀如嶽  
之崇如蘭之臭經德秉哲綽然有裕

述後賢志第十一

博考行故總厥舊聞班序州部區別山川憲章成敗旌昭仁賢抑絀  
虛妄糾正繆言顯善懲惡以杜未然

述序志第十二

駟牡駉駉萬馬龍飛陶然斯猶阜會京畿麇獲西狩鹿從東麋郇伯  
勞之旬不接辰嘗茲珍嘉甘心庶幾中爲令德一行可師瓚璋俶儻  
貴韜光暉據冲體正平揖宣尼道以禮樂教洽化齊木訥剛毅有威



益梁寧三州先漢以來士女目錄

常道將集

高尚逸民嚴遵字君平成都人也

高尚逸民林閻字公孺臨邛人楊雄師之見方言

德行治中從事李弘字仲元成都人也

德行給事黃門侍郎楊雄字子雲成都人也

文學神童楊烏雄子也七歲預父玄文九歲卒

文學侍中揚州刺史張寬字叔文成都人始受文翁遺東受七經還以教授者

文學中郎將司馬相如字長卿成都人也

文學諫議大夫王褒字子淵資中人也

尚書郎楊壯成都人也見楊子方言

美秀中郎將何霸字翁君郫人也

執正大中司空汜鄉侯何武字君公霸弟以忠正為三公王莽欲篡位憚而殺之

穎川太守何顯武弟也兄弟五人皆在漢書

黃門侍郎鄧通蜀人孝文帝時為侍郎甚有寵

卓王孫臨邛人見食貨志姑仍舊列於執正目下

政事左衛護軍陳立字少遷臨邛人歷梓柯巴郡天水三郡太守治為天下最

節士太中大夫章明字公孺新繁人也

節士尚書郎侯剛字直孟新繁人也

節士尚書郎王嘉字公卿江原人也

節士美陽令王皓字子離江原人也

右十九人在前漢其侍郎田儀楊德意無善事在中也

知士博士羅衍字伯紀成都人也

德政益州太守王阜字世公成都人也

長沙太守任循字伯度成都人也少失父後為長沙父流離遠屈長沙為郡五官父母識知是事在精通也

公亮大司農司隸校尉任昉字文始循子也



徐州刺史任愷字文悌助弟也

文學校書郎楊終字子山成都人也

文學侍中漢五更張霸字伯饒諡曰文父成都人也

聘士張楷字公超文父子也

聘士張光超公超弟也

尚書張陵字處沖公超子也自陵之後世有大官

義士趙定成都人以延仁赴義濟窮恤乏為業

保貴太尉司徒司空特進廚亭文侯趙戒字志伯子定

文學國師太常趙典字仲經戒第二子也

忠亮太尉司徒郵惠侯趙謙字彥信戒孫也其子孫襲廚亭侯不顯

道德司徒司空趙溫字子柔謙弟自是後世有二千石

義烈侍中長水校尉常洽字茂尼江原人也見趙溫傳

道德侍御史常詡字孟元江原人在趙太尉公者舊傳

述作謁者僕射何英字叔俊郫人也作漢德春秋

經治犍為屬國何汶字景由英孫也

高士楊由字哀侯成都人也見後漢方術傳

篤愛高士侯祈字升伯繁人文父楊序弟子

篤愛博士楊班字仲桓成都人也何萇弟子

公府辟士羅衡字仲伯郫人亦萇弟子也

至孝孝廉禽堅字孟由成都人也

推賢美陽令柳宗字伯騫成都人也

求次方

王仲曾

張叔遼

殷知孫並蜀人伯騫所拔皆至郡守失其官名

匡正治中從事張充字伯春江原人也

匡正司空辟士李晃字孟元江原人也

猛略部從事楊竦字子恭成都人也子統為二千石失其官

守憲陳湛字子伯成都人也

節士仲昱成都人也

高士王廣皓子也父為公孫述所聘自劾廣逃匿述破後郡及州命察舉皆不往曰吾不能復仇敢當世榮利也

仁義志士任末字叔本繁人也

烈士嚴道主簿李磬字文寺嚴道人也

義烈郡功曹史朱普字伯禽廣都人也

巴郡太守朱辰字元燕廣都人也

述作漢中太守鄭廛字伯邑臨邛人也作者舊傳

右四十人馳名後漢尚書郎張俊失其行事不載學士張寧見朱倉傳舊校云倉字雲卿見下

目什郡人傳未詳

大鴻臚何宗字彥英郫人也

雙柏長何雙字漢偶宗子舊校云雙柏乃建寧郡屬縣也

穎逸廣漢犍為太守何祗字君肅郫人也

忠勲輔漢將軍張裔字君嗣成都人也

玄寂太常杜瓊字伯瑜成都人也

侍中常竺字代文在者舊傳

南安將軍張表字伯達成都人也伯父肅廣漢太守父松字子喬州牧劉璋別駕從事

永昌太守王伉成都人也見蜀書

右八人在劉氏世

五更張霸夫人司馬敬司成都人也

公乘會婦張氏廣都人也

犍為楊鳳珪妻陳助臨邛人也

廣漢便敬賓婦常元常江原人廣都令常良女也

殷氏婦常靡常江原人常仲山女也

趙侯夫人常紀常江原人常侍女

景奇妻羅貢鄆人羅倩女也

趙憲妻何珖鄆人也

朱叔賢妻張昭儀繁人也

廣柔長姚超二女姚妣饒鄆人也

廣漢王遵妻張叔紀霸女孫也

右十一人列女

右蜀郡士女七十四人六十三人女

明略渡沔侯范目閬中人也

文學聘士洛下閔字長公閬中人也

玄始侍御史任文孫閬中人也

文學司空掾任文公文孫弟也

先生胥君安見春秋傳首

京兆尹徐誦字子產閩中人也

忠正侍中譙隆字伯司閩中人也

高清太中大夫譙玄字君黃閩中人也

潔白尚書郎譙英玄子也以易授孝明帝

公車令趙珩字孫明閩中人也

公府掾趙毅字仲都珩子也

公車令臧太伯宕渠人也見珩傳

雋才涼州刺史趙宏字溫柔閩中人也

右十三人前漢

政事揚州刺史嚴遵字王思閩中人也

徐州牧嚴羽字子翼王思子也

長安令王偉卿王思友見王思傳

政事大司農玄賀字文和宕渠人也

將略大鴻臚龐雄字宣孟宕渠人也

政事幽州刺史馮煥宕渠人也

明略使持節車騎將軍馮緄字鴻卿煥子

降虜都尉馮元字公信緄弟

尚書郎馮遵字文衡元子

政事司隸校尉陳禪字紀山安漢人也

漢中太守陳澄禪子

別駕從事陳實字盛先澄孫也與王文表為友

思防治中從事楊仁字文義閬中人也

志士荊州刺史龔調字叔侯安漢人也

忠貞魏郡太守趙晏字平仲安漢人也

籌畫益州太守李顥字德印墊江人也漢書及巴者舊傳

汝南太守謁煥字闕江州人也見汝南記

度遼將軍桂陽太守然温字闕江州人見巴耆舊傳

美化越嵩太守張翕字叔陽安漢人也

越嵩太守張璠翕子也太守王堂察舉孝廉

至孝上蔡令趙邵字泰伯闕中人也

孝子嚴永

名儒陳髦

隱士黃錯右三人巴郡太守王堂所進失其官位見堂傳

巴郡太守龔楊字闕墊江人

茂才孟彪江州人右並王文表薦

日南太守黎景字闕墊江人

茂才王澹闕中人也見文表傳

文學掾龔策墊江人

桂陽太守李温宕渠人



戶曹掾趙芬

宕渠人

上庸太守陳宏

安漢人 見巴紀

忠義宕渠主簿曲庾

宕渠人也

忠義宕渠主簿馮湛

宕渠人也

烈士郝伯都

閬中人也

右三十九人後漢

司隸校尉程烏等失其事不錄

義烈江陽太守程畿

字季默 閬中人也

程祁字公弘

畿子也

楊汰字季儒

巴郡人也

韓儼

巴西人

黎韜

巴西人 三人 見楊文然傳

壯烈將軍嚴顏

臨江人 見張飛傳

玄貞徵士周舒字叔布

閬中也

文學儒林校尉周羣字仲直也舒子

博士周巨羣子也

雅重車騎將軍育陽景侯黃權字公衡閩中人在魏  
儀同三司

尚書郎黃崇權子也

勇壯折衝將軍西陵太守甘寧字興霸臨江人  
仕吳

政事鎮南大將軍彭鄉亭侯馬忠字德信閩中  
人也

將略鎮北大將軍安漢侯王平字子均宕渠  
人

果壯左將軍宕渠侯勾扶字孝興漢昌人也  
見王平傳

將略盪寇將軍關內侯張嶷字伯岐南充國  
人也

尚書僕射姚伷字子緒閩中人見楊義傳  
諸葛亮故事也

別駕從事馬勳字盛衡閩中人見季  
漢輔臣傳

尚書馬參字承伯閩中人  
見蜀書

越巂太守龔祿字德緒安漢人父諶捷  
為太守見巴紀

鎮軍將軍龔璣字德光祿弟也

徵士譙岍字榮始西充國人也周父

淵通散騎常侍城陽亭侯譙周字允南岍了在劉氏光祿大夫

右二十三人在劉氏三國之世

馬妙祈妻義貞烈

趙雲君妻華貞烈

王元愼妻姬貞烈以上皆閬中人

趙瓚妻姬節烈宕渠人

童女趙英瓚女

趙萬妻娥宕渠人

耿秉妾行安漢人

鮮尼母姜安漢人

右八人列女

右巴郡凡士女七十八人七十人女

道德三老楊統字仲通新都人也曾祖仲績祁令父春卿為公孫述將

光祿大夫楊博字仲達統長子

文學侍中楊序字仲桓諡曰文父博弟

高士寇權字文儀綿竹人序弟也

高士昭約字節宰維人也序弟子二人見序傳

術藝使持節交州牧楊宣字君緯什邡人

學士嚴象廣漢人宣弟子也

大儒趙翹廣漢人宣弟子也

烏丸校尉郭堅字闕維人也

善績司隸校尉郭賀字喬卿堅孫

光祿大夫侍中衛尉鐔顯字子誦鄆人

廬江太守蔡弓字子騫維人

永昌太守鄭純字長伯鄴人也

文學高士王祐字平仲鄴人也弟灌有文才而不悉行事也

文才樂安相李尤字伯仁維人也

尚書郎李充尤孫也

文才東觀郎李勝字茂通維人也見尤傳

公亮將作大匠翟酺字子超維人也

明廉侍御史洛陽令王煥字稚子鄴人也

司隸校尉王堂字敬伯鄴人也

聘士王稚字叔起諡曰憲文維人堂少子

堂長子博失官位

博子遵亦失官位

善績蜀郡太守王商字文表遵子也

亢烈辟士段恭字節英新都人也

隱士夫子段翳字元章新都人也

隱士馮信字季誠鄭人也

越舊太守馮顥字叔宰鄭人也

武威太守南陽折侯張江維人

鬱林太守折國江四世孫因封國改姓折

高士折象字伯式國之子也

治中祭酒朱倉字雲卿什邡人

政事牂柯太守劉寵字世信縣竹人

孝子江陽符長姜詩字士遊維人

陰德郿令王饨字少林新都人也

交州牧羊甚鄭人也

推讓野王令羊朞字仲魚甚子

文學侍中董扶字茂安縣竹人楊厚弟子也

文學聘士任安字定祖縣竹人亦厚弟子

高讓義士杜真字孟宗縣竹人

精誠五官諒輔字漢儒新都人

義士楊寬字叔仲新都人父斌兄混皆有證明君事失其官位

義士張鉗字子安廣漢人也

烈士賈栩字元集什邡人也

節士甯叔字茂泰廣漢人也

忠義絲竹主簿韓揆字伯彥縣竹人

壯童左喬雲縣竹人

孝廉汝敦新都人

周幹廣漢人

彭緄廣漢人

古朴廣漢人右三人儒學文才見蜀志

方術太醫丞郭王字通直新都人

右五十二人馳名漢世

別駕從事李朝字永南鄴人也

丞相西曹掾李邵字偉南朝弟也

按陳壽季漢輔臣贊注偉南名朝永南兄入為別駕從事永南

名邵丞相亮辟為西曹掾是此及廣漢士女贊注解皆互誤永偉二字

文才大司農秦宓字子敕縣竹人

益州太守王士字義強鄴人也子祐

別駕從事王甫字國山士從弟也

優遊特進太常關內侯鐔承字公文鄴人

才儁江陽太守彭蒙字永年廣漢人

忠謀從事鄭度縣竹人也見劉璋傳

忠烈從事王累新都人也見劉璋傳

右九人在劉氏世及二牧時



聘士任安母姚縣竹人也

姜詩妻龐行維人也

姜嬪字義舊縣竹人也狄道長姜穆女司馬雅妻

廖伯妻殷紀配人也廣漢

便敬妻王和新都人也

李珥字進娥馮人李氏女馮季宰妻也

王輔妻彭非廣漢人也

李平字正流廣漢李元女楊文妻

袁稚妻相烏德陽人也

王上妻袁福德陽人也

汝敦妻失姓不知何縣人也

右十一人列女

右廣漢郡凡士女七十二人六十一人女

知術光祿大夫關內侯王延世字長叔資中人

揚州刺史楊莽字翁君武陽人見何霸傳

忠壯復漢將軍朱遵字孝仲武陽人也

隱遯合浦太守費貽字奉君南安人也

隱知徵士任永字君業樊道人也

精密上黨太守趙松字君喬武陽人也

文學城門校尉董鈞字文伯資中人

秀穎司隸校尉楊渙字孟文武陽人見魏焉者舊傳

漢中太守楊文方渙子文方子穎伯冀州刺史仲穎二千石失其行事

政事司隸校尉楊準字伯邳文方兄子太守太尉李固舉之

清秀大司空張皓字叔明武陽人也

正直光祿大夫廣陵太守張綱字文紀皓子也

郎中張植綱子也

尚書張續植弟也

豫州牧張方字公始續弟也

正直司隸校尉趙旂字子鸞資中人也

別駕從事王元武陽人刺史張喬時見楊統傳

義士公車令杜撫字叔和資中人也

義士新都令趙敦字建侯武陽人也

孝士尚書郎隗相字叔通夔道人也

呂孟南安人不詳其事

吳順字叔和夔道人也

學士韓子方夔道人張貞之師

學士謝褒南安人

右二十四人在漢世

政事蜀郡太守關內侯楊洪字季休武陽人

固率諫議大夫費詩字公舉南安人

忠正車騎將軍都亭侯張翼字伯恭武陽人綱後也

文學五官中郎將伍梁字德山南安人

文才射聲校尉楊義字文然武陽人

右五人在劉氏世從事賈龍不悉其事不錄

漢中太守楊文方妻陽姬武陽人也

相登妻周度夔道人也

曹敬字敬姬南安人周紀妻也

程貞玦字瓊玉牛鞞人資中張惟妻也

尹仲讓妻韓姜夔道人也

儀成妻謝姬南安人也

趙媛姜資中人趙盛道妻也

張貞妻黃帛夔道人也

楊進武陽人廣漢王博妻

右九人列女

右健為郡士女凡三十八人二十九人士九人女

忠正城陽中尉鄧先成固人也景帝時

楊王孫成固人

致遠衛尉博望侯張騫成固人武帝時

爽朗給事中張猛騫孫元帝時

高尚逸民鄭子真褒中人成帝時

右闕

大儒李頡南鄭人

文學司徒李邵字孟節頡子

執正太尉李固字子堅邵子

雅望京兆尹李燮字德公固少子

奉車都尉李歷字季子固從弟也

善績司隸校尉李法字伯度南鄭人也

健為太守趙宣字子雅南鄭人也

德望廣漢太守趙瑤字元珪宣子

溫雅尚書趙琰字稚珪瑤弟

義壯弘農太守陳綱字仲卿成固人也

義烈從事陳調字元化綱子

知思巴郡太守陳雅字伯臺成固人也

南郡太守程基字稚業南鄭人也

大鴻臚劉巨公南鄭人也 見列女傳

廣漢屬國張泰字伯彊南鄭人也

政事度遼將軍張亮則字元脩泰從弟

愷悌絲竹令閻憲字孟度成固人也

隱士樊志張南鄭人見征西將軍段熲傳

尚志聘士衛衡字伯梁南鄭人樊志張弟子也

籌畫計曹史程苞字元道南鄭人也

文才段萌長祝龜字元靈南鄭人也

義烈郡主簿段崇字禮高南鄭人也

義烈功曹程信字伯義南鄭人也

嚴孳

李容

陳巴

王宗

姜濟

曹廉

勾矩

劉旌

原展闕

義烈從事燕邠字元侯南鄭人也

義烈主簿趙嵩字伯高南鄭人也

右三十八人後漢

陳術字申伯歷二郡太守見蜀書撰益部耆舊傳者

右一人劉氏之世

李穆姜安衆令程祗妻李法姊也子基

劉泰瑛巨公女楊矩妻

杜泰姬南鄭人健為太守趙宣妻

楊禮珪成固楊元珍女陳省妻

李文姬太尉固女趙瑛妻

陳順謙鄧令曹寧妻陳伯臺從女也兄子陳規著書稱之



陳惠謙順謙妹度遼將軍張亮則夫人

張禮倚南鄭人趙嵩妻

韓樹南南鄭人趙子賤妻也

右九人列女

右漢中郡士女凡五十人四十一人

忠義鎮遠將軍義侯文齊字子奇梓潼人也平帝用為益州太守遂不服王莽公孫述光武嘉之

北海太守文屯齊子也

節士李業字巨遊梓潼人也

遂久令李翬業子

益州太守景毅字文堅梓潼人也

政事有道景鸞字漢伯梓潼人也

文學孝廉楊充字盛國梓潼人也

壯烈濟陰相寇祺字宰朝梓潼人也

壯烈童人李餘涪人也

義士功曹張壽字伯僖涪人也

義士王晏字叔博涪人也

方士李助字翁君涪人也

右十二人漢世

尚玄諫議大夫杜微字國輔涪人也

李仁字德賢涪人也

太子僕射李譔字欽仲涪子也

太子家令尹默字思潛涪人也

丞相參軍文恭字仲寶涪人也

果銳前監軍大將軍司馬李福字孫德涪人也見諸葛故事蜀書

右六人劉氏世

文極字季姜涪人將作大匠王堂夫人也

巴郡虞顯妻杜慈涪杜季女也

郭孟妻楊敬涪楊女也

右列女三人

右梓潼郡士女二十一人十八人女三人

脩慎少府太常關內侯王謀字元泰漢嘉人也

雲南太守張休闕

右二人漢嘉人士在劉氏世

文學荊州刺史尹珍字道真丹斂人也

巴郡太守傅寶字紀圖平夷人也

忠義冠軍將軍寧州刺史謝恕字茂理丹斂人也

右三人犍柯人士

忠義大將軍朝侯祭酒錫光字長沖闕

右一人西城人士

忠義雲南太守陽遷亭侯呂凱字季平不韋人也

右一人永昌人士

義正安漢將軍建寧太守李恢字德昂闕

領軍爨習闕

御史中丞孟獲闕

右三人建寧人士

輔漢將軍孟琰字休明闕

右一人朱提人士

先泥和女絡符人也

右一人列女江陽人

大凡三州十三郡自漢興至三國之終士女載傳記者二百四十人

二百九十三人  
士四十七人女

公七人

大將二十二人

侯二十人

卿佐十四人

侍中七人

尙書五人

司隸校尉六人

州刺史十三人

郡守四十八人

國師三人

光祿大夫四人

尙書郎十二人

中書郎將御史六人

公車令諫議太中十一人

公府辟士八人

高士一人

聘士七人

徵士四人

節士四人

列女四十七人

按人數不合蓋傳寫多非其舊也卷中前後各條皆倣此

益梁寧三州三國兩晉以來人士目錄添立目錄

明略大司農西城公何攀字惠興郾人

清秀大長秋壽良字文淑成都人也

果烈西河太守柳隱字休然成都人也

梁益二州都督杜禎字文然成都人也

都督度支巴東太守柳伸字稚原成都人也

德行江陽太守何隨字季業郾人

令德健爲太守杜軫字超宗成都人也

健爲太守杜烈字仲武軫弟

建寧太守杜良字幼倫軫少弟

益州刺史杜毗字長基軫子

德行給事中任熙字伯遠成都人也

涪陵太守任蕃字憲祖熙子

義正郫令常勗字脩業江原人也

州都常忌字茂通勗從弟也

令才太史令高玩字伯珍江原人也

闕才湘東太守常騫字季慎江原人也

述作武平太守常寬字泰恭騫從弟也

使持節西夷校尉張岐字紹茂成都人也

征西將軍西夷校尉益州刺史王異字彥明成都人也

勇略雍州刺史南中郎將重安開國侯李陽字叔文郾人

征虜將軍廣漢梓潼太守楊謙字令志成都人也

右二十二入蜀郡人在晉世

強濟少府成都威侯李毅字允剛郾人

西夷校尉李釗字世康毅子

仁讓漢嘉太守司馬勝之字興先縣竹人

德義梓潼太守王化字伯遠郾人表孫

巴東太守王振字仲遠化弟也

作唐令王岱字季遠振弟也

述作蜀郡太守王崇字幼遠岱弟也

素隱中書郎王長文字德儁郾人也

建寧太守段容字宗仲廣漢人也

右九入廣漢人在晉世



漢中太守李宓字令伯武陽人也

汶山太守李賜字宗碩宓子也

太傅參軍李興字雋碩賜弟也

廣漢太守張徵字建興翼子也

譙國內史費緝字文平南安人二子見壽良傳

執義衡陽內史楊邠字岐之武陽人也

清正尚書費立字建熙南安人也

右七人健為人士在晉世

衛尉文立字廣休臨江人也

武陵太守楊崇臨江人也

牂柯太守毛楚枳人也

右三人巴郡人在晉世

述作太子中庶子陳壽字承祚安漢人也

驃騎府掾陳蒞字叔度壽兄子

上廉令陳符字長信壽兄子

建寧太守陳階字達之蒞弟

正直漢中太守閻纘字續伯安漢人

卓略長水校尉荊州刺史張弈字希祖南充國人

令德錫令謙同字彥紹周子見周傳

義烈揚烈將軍梓潼內史謙登字順明周孫

右八人巴西人士在晉世

清重長水校尉呂淑字偉德闕

右一人漢中人

廣漢太守李驥字叔龍福子

右一人梓潼人

忠義江陽太守侯馥字世明闕

右一人江陽人

三州後賢五十人并前賢二百九十一人

譔曰凡此人士或見漢書或載耆舊或見郡紀或在三國書并取秀異表之斯篇其洪伐弘顯者並附載者齊之其但見名字而不詳其行故或以有傳無珍善闕之以副直文爲實錄矣

華陽國志卷第十二

華國圖志卷之十二

許楚趙以會... 以臨直文... 齊效矣

與夫... 並州... 其回... 不... 其... 三... 百... 十... 一... 人

本... 人... 工... 人

補華陽國志三州郡縣目錄

鄰水廖寅

巴郡 屬縣七

江州

枳

臨江

平都

墊江

樂城

常安

巴東郡 屬縣四

魚復

胸忍

漢豐

南浦

涪陵郡 屬縣五

涪陵

丹興

漢平

萬寧

漢髮

巴西郡 屬縣四 志云屬縣七又云其三縣為郡謂分置宕渠郡也

閬中

南充國

安漢

平州

宕渠郡 屬縣三

宕渠

漢昌

宣漢

漢中郡 屬縣六

南鄭

沔陽

褒中

成固

蒲池

西鄉

魏興郡 屬縣六

西城

錫

安康

興晉

鄭鄉

洵陽

上庸郡

屬縣五

舊有安樂誤也今不列

上庸

北巫

武陵

安富

微陽

新城郡

屬縣四

房陵



汭鄉

昌魏

綏陽

梓潼郡

屬縣五

梓潼

涪

晉壽

白水

漢德

舊誤作廣漢德陽二縣今改正說具在志中

武都郡

屬縣九

下辨

武都

上祿

故道

河池

沮

左平樂

脩成

嘉陵

陰平郡 屬縣四

陰平

甸氏

平武

剛氏

右梁州

蜀郡 屬縣六

成都

郫

繁

江原

臨邛

廣都

廣漢郡

屬縣八

雒

緜竹

什邡

新都

五城

郫

廣漢

德陽

犍爲郡  
屬縣五

武陽

南安

燹道

牛鞞

資中

江陽郡  
屬縣四

江陽

漢安

符

新樂

汶山郡 屬縣全闕

晉書地理志云統縣入汶山升遷都安  
廣陽興樂平康蠶陵廣柔說具在志中

漢嘉郡 屬縣全闕

晉書地理志云統縣四漢嘉  
徙陽嚴道旄牛說具在志中

越巂郡 屬縣十二

邛都

臺登

闡

蘇示

會無

大柞

定柞

三縫

卑水

潛街

安上

馬湖

右益州

牂柯郡 屬縣四

萬壽

且蘭

廣談

毋斂

平夷郡 屬縣二

平夷

懿

夜郎郡 屬縣二

夜郎

談指

晉寧郡 屬縣七

滇池

同勞

同安

連然

建伶

毋單

秦臧

建寧郡 屬縣十三

味

牧麻

同樂

穀昌

同瀨

雙柏

存馳

昆澤

漏江

談橐

伶丘

脩雲

俞元

舊誤作新定今改正說具在志中

平樂郡

屬縣四



新定

興遷

平樂

三沮

朱提郡

屬縣五

朱提

堂螂

南秦

漢陽

南昌

南廣郡

屬縣四

南廣

臨利

常遷

新興

永昌郡 屬縣八

不韋

比蘇

哀牢

永壽

嵩唐

雍鄉

南涪

博南

雲南郡 屬縣五 志云屬縣七又云其縣二別為郡謂分置河陽郡也

雲南

葉榆

遂久

弄棟

蜻蛉

河陽郡

屬縣四

郡分雲南二縣又新立二縣今志存河陽一縣故知脫其一縣也

河陽

闕

闕

闕

梁水郡

屬縣三

梁水

賁古

西隨

興古郡 屬縣七

宛温

律高

鐔封

句町

漢興

勝休

都唐

西平郡 屬縣三

盤江

來如

南零

右寧州

常璩是書巴志漢中志爲梁州蜀志爲益州南中志爲寧州其郡縣未列子目殊難尋檢李至所刻脫落錯誤讀者尤不明晰予旣訂正刊行復作此目錄一通古人著述例以目居全書之後璩之士女目錄亦然故今更附其末云

補華陽國志梁益寧三州郡縣目錄